



759


B. 10 B

12 plates









Digitized by the Internet Archive
in 2017 with funding from
Getty Research Institute



ZODIACVS

CHRISTIANVS

locupletatus

Seu

Signa XII. Divinæ

PRÆDESTINA

TIONIS

*Totidem Symbolis
explicata*

Ab

Hierem: Drexelio

è Societate IESV.



AD SCEPTVM ET

AD GLADIVM ET

COL: AGRIPPINÆ

Apud Cornel: ab Egmond.

cIo: Ioc. XXXII.



AD CORONAM.



AD FLAMMAM

ZODIACAL

CONSTITUTION

OF THE

UNION

OF THE

STATES

OF AMERICA

AND

THE

WORLD

OF

THE

UNION

OF

THE

STATES

OF

AMERICA

Ill.^{mo} Principi ac Domino , Dño

I O A N N I

Comiti in Hohenzollern, Sigmar-
ring & Vöringen ; Domino in Hai-
gerloch, & VVehrstain : Sac. Rom.
Imperii Camerario hæreditario: Cæs.
Majest. & Ser.^{mo} Bavarix Ducis ac E-
lectoris à Consiliis secretis, ejusdem
Supremo, & præfecto Aulæ, & Ca-
merario.

EDitionem priorem Zodiaci
Christiani, Ill.^{me} Princeps, no-
mini tuo sacravi : hanc tertiam
eidem consecro , idque lubens
merito. Gracilis est hic libellus,
& forma, quam ante, gratior, re-
auctior & emendatior. De hu-
manissima tua benevolentia nil
licet ambigere, quin ea, hoc etiam
quantumcunque tenue obsequii
genus, prono affectu prosecutura
sit. Seneca ad Liberalem Æbu- *Sen. l.*
cium : Neminem umquam vidi, *5. de*
ait, tam benignum, etiam levissi- *benefic.*
morum officiorum æstimatorem. *c. 1.*
Idem ego de Te, Ill.^{me} Princeps,
A 2 jure

DEDICATIO.

jure affirmem Nimirum ea maximorum virorum indoles est, ut donantis tenuitatem, humanitatis suæ opulentia non gravate locupletent. neque enim nesciunt mores pauperum, qui cum nequeunt offerre thura, lac ferunt, aut idem etiam sæpius donant: istud ego hîc facio. Revertor igitur ad Ill.^{mam} Celsitudinem tuam, & hoc Prædestinationis arcum, coram Ser.^{mo} Electore Maximiliano, & Ser.^{ma} conjuge Elisabetha explicatum, denuo in tuas manus trado, tuis prius auribus acceptum. Atque hac ratione Zodiacum Illustrissimi Nominis tui tutela defensum, in publicum reduco. Monachii, die B.^{mæ} Virginis ab Angelo salutatæ. Anno M. D. C. X X V.

Ill.^{mæ} Celsit. Tuæ

Obsequentissimus cliens

Hieremias Drexelius,
è Societate I E S V.

LEC-

LECTORI S.

HAbes, pie Lector, XII Signa divina Prædestinationis, è SS. litteris & SS. Patribus, subsecro studio collecta, & memoria iuvanda, totidem Symbolis assignata. Permissi quidem antehac, rogantibus amicis, Zodiacum edi de his ipsis Prædestinationis signis: sed extemporalem illam & tumultuariam scriptiunculam, nunc abolitam cupio & expunctam. Per te id liceat, mi Lector, obsecro: & abjecto priore illo Zodiaco, hunc non tantum correctiorem, sed & altero tanto auctiorem substitue. Et hoc tibi speculum sume quotidie inspiciendum. Tuum hinc erit considerare, quot in te Prædestinationis signa deprehendas: an omnia, an nullum; unum, an pauca. Ex quo proinde facilis erit conjectura, cui libro, Vitæ an Mortis, tuum nomen sit inscriptum. Supremo Mundi die, hi libri etiamnum clausi, aperientur. Et qui non fuerit inventus in libro Vitæ scriptus, mittetur in stagnum ignis. *Apoc. 20. Luc. 10.* Hi vero quorum nomina scripta sunt in cælis, immensum gaudebunt & æternum.

TYPOGRAPHVS LECTORI.

Symbola Zodiaci Christiani suis quaque locis, ex adverso Signis præposuimus, majoris commoditatis & ornamenti gratia.

SYMBOLVM .I.

Lux interna.



*Lucerna pedibus meis verbum
tuum, et lumen semitis meis.*

Psal. 118.

PRIMUM

PRÆDESTINATIONIS
SIGNVM.

SYMBOLVM I.

CREVS ardens. Ardente cerco designatur *Lux interna*, quæ beneficia Dei, vanitatem mundi, vitæ brevitatem, peccatorum cœnum, voluptatum omnium vanescentes umbras sic ostendit, ut, qui hæc videre incipit, cœlum jam suspiret & exclamet cum regio vate. Sitivit anima mea ad Deum *Psal.* fortem, vivum; quando veniam & apparebo ante faciem Dei? Multi dicunt, quis ostendit nobis bona? signatum est *Psal.* super nos lumen vultus tui, ô Deus, & *4. & 88.* in hoc vultus tui lumine ambulabimus.

I. Habemus magistrum intra nos, lumen rationis, quod liberalissimus Deus, à suomet vultu derivatum, in meliore hominis parte collocavit. Hoc lumen non tantum à bestiis nos fecerit, sed Deo jubet esse similes. Hoc lumen menti humanæ impressum, indelebilis est concio, qua identidem monemur: *Faciendum alteri non esse, quod nobis ab aliis fieri nolimus*, ab altero enim sperandum, quod alteri fecerimus; qua mensura mensi fueritis, remetietur vobis *Luc. 6.*

bis. proinde nec vi nec dolo, neque bona neque pudicitiam aliorum temerandam. Hoc lumen & creata omnia, & ipsum nobis (sub velo tamen) monstrat creatorem Deum, habentem omnia, perfectum, beatissimum, æternum, ipsum sibi cunctisque sufficientem, principium & medium & terminum. qui lucem habitat inaccessam, qui operibus & muneribus tam amabilis, quam potens, cujus idem sit & VELLE & FACERE: qui totus misericordia sit & bonitas; idem tamen sanctus, severus, incorruptus, inadulabilis iudex: idem totus iustitia; qui forma & magnitudine nobis sit inenarrabilis, cui nihil simile nec videamus, sed nec suspicari aut conjicere possimus visuros: præ quo venusta omnia & pulchra, merissimæ sint tenebræ & vilis umbra: quæ quidem amabilissima & summa pulchritudo, nihil sibi gratius habeat quàm *amari*. Hoc idem lumen, nostri nobis conditoris ostendit opera, alternum diei noctisque imperium, oculeam stellatamque cæli maiestatem, longissima solis lunæque itinera, florulentum terræ gremium, spatiosissimos fluminum errores, tremendum maris dominium, animalium nationes, proventus fructuum: quæ omnia non manibus nec labore ullo fecerit Deus, sed quia voluerit hæc fieri, facta sint omnia.

Hoc quoque rationis & fidei lumen
su-

supremam hominis felicitatem in eo
 sitam commonstrat, si suo se opifici quā
 maxime affimilet homo, gratum nam-
 que semper esse omne quod est simile:
 certū enim imagini nil fieri posse meli-
 us, quam si exemplari suo sit quam si-
 millima, & hoc demum etiam futu-
 rū, sed aliis in terris, in orbe alio, in re-
 gione vivorum. nondum apparuit, in-
 quit Ioannes, quid erimus; scimus, quo-
 niam cum apparuerit, similes ei erimus,
 quoniam videbimus eum sicuti est. Ex
 affulgente hoc lumine, è cogitatione
 tali ingens existit in voluntate lætitia;
 spes sese in altum attollit, magnus in
 Deum calensque affectus consurgit.
 quid enim dulcius, quam seipsum vivā
 infinitæ pulchritudinis imaginem cir-
 cumspicere; scire, suo se exemplari esse
 charissimum? quia vero non omnibus
 hoc lumen ita liberaliter affulget, bea-
 tus David, non eandem etiam omnium
 esse lætitiā expertus, de prærogativo
 hoc munere sibi plurimum gratulatur,
 & : Signatum est, inquit, super nos
 lumen vultus tui Domine : dedisti læti-
 tiam in corde meo. non in corde omni-
 um, sed in meo, eorumque qui à te, ô
 bonitas, prædestinati sunt ad vitam:
 ideo in hoc lumine vultus ambulabi-
 mus, & in nomine tuo exultabimus to-
 ta die, læti, emerfisse nos è tenebris, ut
 quotidie magis ac magis in sanctissimæ
 voluntatis tuæ notitia erudiamur, &

I. Ioa.
3.

Psa. 4.

Baruc. arcaniorem in dies tecum ineamus ami-
c. 4. citiam. Beati sumus, ô Israel, quia
Iob. quæ Domino placent, manifesta sunt
c. 29. nobis. Iobus, cum ei omnia è terra,
 è cælo adversarentur, hujus tamen lu-
Eccles. minis jucunde recordatus: Splendebat,
c. 2. ait, lucerna ejus super caput meum, &
Is. c. ad lumen ejus ambulabam in tenebris.
58. Ergo vos, inquit Ecclesiasticus, qui ti-
 metis Dominum, diligite illum, & il-
 luminabuntur corda vestra. Lux vestra
 in tenebris orietur, & requiem dabit
 vobis Dominus semper, & implebit
 splendoribus animas vestras, quod si
 deflexeritis à Deo, Ægyptiis undique
Eccli. tenebris involvemini. Nam error &
c. II. tenebræ peccatoribus concreatæ sunt.

Sap. II. Talia, inquit divinus Spiritus,
c. 5. dixerunt in inferno hi, qui peccaverunt.
 quænam illa? neque enim otiosa vide-
 tur aut inutilis curiositas, nosse, quæ a-
 pud inferos loquantur damnati. quæ a-
 pud exteras nationes, in regum pala-
 tiis, in principum curiis agantur, avari
 audimus: scire, quæ apud inferos fiant,
 si non ingratum, multo minus erit inu-
 tile; præsertim cum hæc non incerta
 sit, uti plerunque rerum novarum nar-
 ratio. qui ergo damnatorum sermones
 sunt? *Ergo erravimus à via veritatis, &*
Sap. *justitiæ lumen non luxit nobis. Ergo erravi-*
c. 5. *mus.* hæc quidem consequentia est, sed
 ubi antecedens? *Venite & fruamur bonis,*
quæ

quæ sunt : vino pretioso & unguento nos impleamus, & non pratereat nos flos temporis. coronemus nos rosis antequam marcescant: nullum pratum sit, quod non pertransseat luxuria nostra. Ad prata se invitant; quid amplius facerent boves & vaccæ? En, istud est antecedens, quod fecerunt in mundo, consequentia primum facta est in inferno. Heu, pessimi dialectici! ubi enim antecedens posuerant, ibi & consequentiam debuissent subjungere: Venite, fruamur bonis quæ sunt. mox fuisset concludendum: Ergo erramus. nam aut in hac vita pœnitendum, aut ardendum in altera; pœnitendum hîc est, non sine fine peccandum; cruces jam cogitandæ non deliciæ; certandum hîc est, alibi triumphandum. Ergo errastis: consequentia bona est & vera, sed nimis fera: & justitiæ lumen non luxit nobis. Et quodnam hoc justitiæ lumen? Si justitia est, uti legumlatores volunt, jus suum cuique tribuere, justitiæ quoque munus erit debitam rebus omnibus æstimationem non negare, illud ergo animi lumen, quod cuivis rei congruam assignat æstimationem, justitiæ seu intelligentiæ lumen merito dicetur. Et hoc est, quo se caruisse damnati queruntur. generosa vina dignoscere, corollas capiti, epulas ventri seligere, per vireta delicias sectari, hæc quidē omnia exacte sciverunt; sed hæc eadem deliciis æteruis nequaquam esse præferenda, suaviter nescire

nescire voluerunt. pudendas & breves oblectatiunculas tanti fecerunt, ut præ illis omnia beatorum gaudia non magni viderentur esse pretii. vina sua, suas epulas, Veneres, rosas suas tā tenere amarūt; ut audacter spernerent ipsas etiam cælestes delicias. adeo chara fuit illis peccandi libertas, ut vilis esset omnis *æternitas*. Sed hæc est iniquissima rerum æstimatio: contrarium docet intelligentiæ lumen, quod unam & unicam summi vult æstimari *æternitatem*, vili pendere cetera omnia. *Ergo erravimus?* Res ipsa loquitur. *Ergo iustitia lumen non luxit nobis?* Nimis jam certum est. Multi sunt, qui nolunt intelligere ut bene agant. Voluntaria sed blanda semet ignorantia decipiunt; omnem viam non bonam ingrediuntur. Ex horum numero & vos fuistis: nolulistis intelligere ut bene ageretur. Ergo clamate jam; & ululate miseri; hæc vestra per totam æternitatem erit cantiuncula: *Ergo erravimus, ergo iustitia lumen non luxit nobis.* hic inferiorum psalmus est, hæc eorum flebilia carmina æternum ploranda.

III. Attendite Christiani, & missos *Barnabæ.* cælo radios ne excludite: det Dominus *c. I.* virtutem nobis, & illuminet oculos nostros. hoc intelligentiæ lumine immisso, facile cuivis patet, non pluris faciendos esse homines quam Deum, nec divitias quam conscientiam, nec pluris hu-

humanum quam divinum favorem : sed nec voluptatem quamcunque cælo præferendam, nec fluxa hæc æternis esse anteponenda. Et vere non habet (ait Chrysostomus) quod super terram amet, qui cælestem dulcedinem degustavit.

Hoc intelligentiæ lumen bonus Deus Augustino liberalissime voluit allucere: Admonitus, inquit, redire ad meipsum, *Lib. I. confess.* intravi in intima mea, & vidi qualicunque oculo animæ meæ, lucem Domini *c. 10.* incommutabilem; qui novit eam, novit æternitatem. Et inveni me longe esse à te in regione dissimilitudinis. Ab hoc intelligentiæ ac iustitiæ lumine nō multum discrepat lumen devotionis, de quo D. Bernardus : Roga, inquit, dari tibi *Sermō. 3. de circum. Dom.* devotionis lumen, diem serenissimam & sabbatum mentis, in quo tanquam emeritus miles in laboribus universis vivas absque labore, dilatato nimirum corde currens viam mandatorum Dei, ut quod prius cum amaritudine & coactione tui spiritus faciebas, de cetero cū dulcedine peragas & delectatione. ad idem invitās nos regius psalter : Accedite, inquit, ad *ps. 33.* eum, & illuminamini: gustate & videte, quoniam suavis est Dominus. amcēnū hoc cordis lumē est, & plena voluptatis flammula, quæ Deum homini majorē in dies atque maiorem ostendit. Ad hoc lumē in humano pectore accensum, quotidie crescit (res mira) incrementi omnis incapax, immensus Deus.

SYMBOLVM.II.

Promptitudo ad mortem.



*Coarctor autem e duobus: desiderium
habens dissolui, et esse cum Christo.*

ad Philipp. Cap. 1.

SECUNDVM
PRÆDESTINATIONIS
SIGNVM.

SYMBOLVM II.

CRANIVM seu CALVA, qua
 declaratur *animus ad mortem quam-*
cunque illam semper paratus. Et vos,
 inquit Christus, similes estote homini-
 bus expectantibus Dominum suum quā-
 do revertatur à nuptiis, ut cum venerit
 & pulsaverit, confestim aperiant ei. Pul. *Hom.*
 sat Dominus, inquit Gregorius, cum *13. in*
 per ægritudinis molestiam mortem vi- *Euan.*
 cinam esse denuntiat. cui confestim
 aperimus, si eum cū amore suscipimus;
 aperire pulsanti iudici non vult, qui exi-
 re de corpore trepidat, & videre illum,
 quem contempsisse se meminit, iudicem
 formidat. qui vero spe & operatione
 securus est, pulsanti mox aperit, vocari
 se gaudet, & ob futuri præmii gloriam
 vel inter lacrymas hilarescit. quin ergo *Phil.*
 dissolvi cupimus & esse cum Christo? *1.*
 multo id melius, quam si prolongetur *Psal.*
 noster hic lugubris incolatus. Non po- *119.*
 test male mori qui bene vixerit, nec *Augu-*
 bene mori qui vixit male. Et quid illud *stin. de*
 est, quod nobis eripi adeo formidemus? *doctr.*
 vita quid est? nisi ludibriorum scena & *Christ.*
 mare miseriarum. quacunque veharis
 navi, aurea an argentea, gemmea seu
 lignea, assilientes fluctus non declina-
 bis,

bis, in adversantes scopulos sæpius impinges, in periculosis vadis crebrius obhæresces. beatus ille qui mare hoc transiit, beatus qui enavit, & jam in portu est. quod si quis ad mortem ante feros annos perveniat, non magis conqueri debet, quam qui cito navigavit.

Quid ergo mortem, laborum finem, præmiorum auspiciū metuamus? hoc iudiciū à Domino omni carni, prioribus sæculis nemo evasit, sed nec futuris evadet ullus : quotquot antecesserint, omnes sequentur; ad hanc legem nati sumus, & eo imus quò eunt omnia: mors, omnibus est finis, multis remedium, probis etiam votum; ijs certe qui ad vitam prædestinati sunt: mors omnium dolorum & solutio est & terminus, ultra quem mala eorum non exeunt. infantiæ foret, optimi Domini decreto resistere, ac tributum nolle pendere quod pendunt omnes, libertatēque ambire, quæ nulli conceditur. Altior est Theologia Christianorum, quæ vitam in patientia, mortē habere novit in desiderio. Cy-

Solin.

de mi-

rabilib.

mundi.

gnus, si Solino credimus, in vita gemit & tristatur, in morte lætatur & canit. itidē electi faciunt, dum vivunt, gemūt; cātant in morte, æternum in cælo lætaturi. ita octogenarius ille olor cecinit,

Luc. 2. Simeon : Nunc dimittis servum tuum in pace. Et cur lamentemur ruente ta-

2. Cor.

5.

guriolo nostro ? scimus quoniam si terrestris domus nostra hujus habitationis dissol-

dissolvatur, quod ædificationem ex Deo habeamus, domum non manu factam, sed æternam in cælis.

I. Et quis è rigido strato non surgat promptius? ii solum cunctantur, qui in plumeo calore mollius foti, difficulter deferunt calentem nidum. ægre tibi est in hac vita? ergo non invitus, puto, transibis ad meliorem. bene tibi est? ergo maturum omnino est ut mox finias, ne te prosperitas, uti multos, præcipitet fera quidem sed gravi ruina. Non ergo timendum est, inquit Tertullianus, quod nos liberat ab omni timendo. longum Deus adimit tormentum homini, cum vitam ei concedit brevem. ideo generosus martyr Cyprianus, audita Valeriani Imperatoris contra se sententia: *Tha sciis Cyprianum gladio animadverti placet*, elatis cælo manibus & oculis: D E O G R A T I A S, respondit, *qui me à vinculis hujus corporis dignatur absolvere*. Miratur Ambrosius, quosdam, cum moriendum, extrudi velle potius è suo carcere quam educi, & : Quid, inquit, est in mundo & vita hac, nisi pugna cum ira, libidine, gula? Ejusdem animi Chrysostomus: *In c. I. ad Cor. Ioss.* Quid, inquit, dicis homo? ad regnum vocaris, ad regnum filii Dei, & oscitabundus es totus, ac desidum more scalpis ac torpes? Si namque singulis diebus vel in mille mortes infiliendū esset, an non omnia ferre oporteret? atqui

B

prin-

principatus gratia nihil non faceres, cū vero consors futurus sis regni Vnigeniti Dei, non objicies te vel mille gladiis, non insilies in ignem? at tu luges etiam quod abiturus hinc es, & præsentibus libenter immoraris, plus æquo corporis curam agens. quidnam hoc est? & mortem etiam horrendum quid esse putas. Horum vere caussa sunt deliciæ & vitæ remissio, alioqui qui vitam vivit acerbam, avolare quoque vellet & ab hac vita liberari. ita idem nobis evenit, quod pigrescentibus avium pullis, semperque in nido hædere cupientibus, sed quanto diutius hæserint, tanto redduntur imbecilliores: Nidus quidam est præsens hæc vita ex festucis & luto compactus. etsi magnificas mihi ostenderis ædes, etiam ipsas regias auro multo & lapidibus pretiosis splendidas; nihil tamen illas ab hirundinum nidis putabo differre. Ingruente namque hieme sponte sua cadent omnia.

Ita fit prorsus, Chrysostome, auree orator: cadunt tandem omnia, & nos cum ipsis, plerunque hoc ipso tutius quo citius. hinc gratulatur Sapiens, Raptum esse justum, ne malitia mutaret intellectum ejus. hinc & Angelus moritimentem increpans: Pati, ait, timetis, exire non vultis, quid faciam vobis? Fidem resurrectionis non habet, qui ad meliora non festinat. Si domus ruinam minetur, nonne prompti ex ea migramus?

mus? si navis inter procellas periclitetur, nunquid animo toti sumus in portu? mundus hic ingentibus ubique ruinis fatiscit, ubique fluctus & procellæ: quin ergo portum cogitamus, quin migramus ad patrem? ubi nos charorum turba expectat, de sua salute secura, de nostra sollicita. O beati mortui qui in *Apo.* Domino moriuntur, quia in Domini *c. 14.* sinu quasi morientes conquiescunt, & sic quiescendo suaviter in mortem obdormiscunt. ita Stephanus inter ipsos *Act.* saxorum nimbos, in tanto lapidantium *c. 7.* tumultu & fremitu, obdormivit tamen in Domino. ita Lazarum amicum suum *Ioan.* Christus obdormiisse dixit. ita & Mo- *c. 11.* ses servus Domini mortuus est jubente Domino. & sicut mater infantulum brachiis suis indormientem deosculatur, & sic in lectulo taciturna molliter reponit; ita sunt qui dicant, scripturæ sensu Moſen ceu dormientem infantē à Deo per osculam & amplexum in sinu Abrahamæ quasi in lectulo collocatum. Nimirum, cum dederit dilectis suis som- *Psalm.* num, ecce hæreditas Domini. Ter beati *126.* sunt hi mortui: amodo jã dicit Spiritus ut requiescant à laboribus suis, opera enim illorū sequuntur illos, tanquam fa- *Apo.* muli suū Dominū, filii suū patrē, nobiles *c. 14.* suū principē; sequuntur usq; ad tribunal Dei, deducunt & comitantur usque ad supremam Dei curiam, quo solum nobiles hi famuli intromittuntur. quisquis

ergo ad vitam prædestinatus est, mortem ut optimum naturæ inventum prædicat, cum non alia via illuc se perventurum sciat, & quia ejusmodi homo nunquã non paratus est mori, sic secum ipse ratiocinatur:

II. Quid mori trepidem? iter patrum, imo omnium latam tritamque semitam ingredior, quid solus ego mihi nescio quid aliud malim? libens faciam, quod facerem etiam nolens: scio, quicquid fit à volente, fit levius, & desinit esse necessitas, cum accedit voluntas. Sed nec tergiversandi causam habeo, cum esse desino, quod invitus fui, mortalis, ideo corpus hoc accepi ut redderem, & ideo reddam, ut denuo recipiam cum fœnore. hætenus à conspectu Dei mei detentus sum per mortales has moras, quibus illi vitæ meliori præluditur. nam lux ista quam velut extremam multi reformidant, æternæ natalis est: veniet iterum qui me in lucem reponat dies, & ideo æquissimo animo, rediturus exibo. ô quam lætus amplectar diem, qui meo me domicilio assignet; qui me hinc ereptum, & omnibus laqueis exutum restituat paradiso! In multis me reum non nescio, sed misericordia tua, ô mi Domine, Oceanus est & immensissimum mare. In hunc ego me Oceanum, in hoc mare præcipitabo, cum me voluerit mors de hoc vitæ colliculo dejicere. sic
unico

unico mei ipsius in finem misericordiæ
 jactu, omnes vitæ molestias abrumpam,
 & utinam mors nullas in via moras ne-
 ctat: quodocunque veniat, volentem
 me inveniet, & paratum quiescere. non
 sic odi quietem, ut respuam malorum
 ferias. Et cur non potius tunc gaude-
 am, cum vitam hanc miseriarum innu-
 merabilium officinam licebit claudere,
 mortis & fortunæ jugū excutere, diem
 ordiri nulla nocte finiendum. Felix nun-
 cius cum me. Rex meus vocaturus est,
 & ex hoc carcere liberaturus: multa
 faciam solutus quæ vinctus nullo un-
 quam studio didicissem. Avicula, aperta
 cavea non ejicitur, sed evolat, sic ego
 in apertas illas & cæruleas plagas libens
 emigrabo, vitæ jam pridem satur. De
 loco mortis meæ, de tempore nil angor
 penitus. faciat ille qui me fecit, quic-
 quid vult. *Voluntas* illius unica mihi vitæ
 mortisque est regula: nil mali ab eo aut
 acerbi metuo qui ipsa est bonitas. Et
 nonne in figuli manu est, vasculum levi
 rota effingere, & idem frangere? Vascu-
 lum ego sum à magno illo Figulo: quid
 querar, si qui me finxit, velit frangere,
 imo refingere & ex misero reddere bea-
 tum? vivere me vult? quandiu vult, vo-
 lo. vult me mori? nullas mortis induci-
 as nec ad momentum posco. initium
 meum & finis ab illo sunt, quicquid il-
 le immiserit, excipiam non libenti tan-
 tum, sed & hilari fronte: mihi vivere

*Philip.
c. I.*

Christus est & mori lucrum. Amo te, ô mi amantissime Deus, cupioque ardentius amare; hac amoris flamma cor meum penitus liquefiat: nihil extra te me beat. Et quando, mi Deus, & quando ad te hinc evolabo? sequor te, benigne parens, sequor, & eo promptius cum propius ad te vocas.

III. Ita sentit, qui alibi vivere, & cum Christo esse cupit: neque istud novi quid est, Nam sicut medicus, inquit Theophylactus, cum videt ægrum fastidire cibos & pharmaca, prior ea ipse sumit, ut ægrum ad eadem sumenda inducat: ita Christus prior ipse gustavit mortem, ut eam gustare non horreat Christianus. Cur jam, mi Christiane, etsi natura timidus sis, & mori te sentias, non priorem illum, quem loquentem audiisti, æmuleris, & intrepido ac fidenti animo tu quoque in has voces erumpas:

Psal.

115.

Calicem salutaris accipiam & nomen Domini invocabo: calix iste amarior quidem est, illum tamen bibit ipse meus Servator & ex cruenta cruce eundem mihi exhauriendum propinavit. Calix iste fatale mortis poculum est, quod Christus sponte, quod omnes omnino homines perhauriunt inevitabili necessitate; cur ego hoc solus recusem? quisquis cœpit vivere, desinere debet, ut de novo incipiat, & quidem illam vitam quam nunquam desinat. quid ergo tibi vis

vis vane timor, quid revocas damnosa
 mæstitia? calicem quem dedit mihi Pa-
 ter, quem Christus mihi miscuit, & ipse
 bibit, non vultis ut bibam illum? mor-
 talis ego sim, & mori non didicerim? Cū
 apud Alexandrum Macedonem gravius
 decumbentem aliquot male anxii amici,
 Philippū medicum de veneno porrigē-
 do infimulassent, Rex Philippum cum
 parata potione ad se venientem sic exce-
 pit: altera manu amicorum illi literas
 porrexit, altera pharmacum ab illo ac-
 cepit: dumque medicam potionem o-
 ri admoveret, oculos in Philippi vultu
 defixit, si quas forte in illo, ob commi-
 stum toxicum, conscientiaē notas depre-
 henderet: cum egregiam in se medici
 fidem è facie disceret, intrepidus por-
 rectum poculum perhausit. ita & ego
 faciam: poculum quod me in quietem
 & longiorē somnū daret, IESVS meus,
 medicus & Servator meus mihi tempe-
 ravit, & porrexit ebibendum: ego, dum
 illud exhaurio, oculos ab hoc meo me-
 dico non dimittam; vultum meum fir-
 mabo in crucifixi Domini mei vultu, in
 quo summum in me amorem inscriptū
 legam, simulque constans & imperterri-
 tus hunc calicem perhauriam, qui tan-
 to plus habet salutis, quo plus amaro-
 ris. Ita, mi Christiane, mors ipsa cum
 venerit, facile vincitur, si prius quam
 veniat, semper cogitetur, nunquam ti-
 meatur.

SYMBOLVM . III .

Frequens Sacramentorum
confessionis et cōmunionis usus



*Hic est panis de cælo descendens, ut si
quis ex ipso manducauerit, non
moriatur. Ioan. 6.*

TERTIVM
PRÆDESTINATIONIS
SIGNVM.

SYMBOLVM III.

AVREA EVCHARISTIAE HIERO-
THECA. Qua exprimitur, *Frequens*
Sacramentorum, Confessionis & Com-
munionis usus. Olim, erant perseveran- *Act.*
tes in doctrina Apostolorum, & com- *c.2.*
municatione fractionis panis. Obser-
vatum est autem luculenter, quo magis
hic Ecclesiæ primævæ mos intepuit, eo
magis ardor spiritus, charitatis ignis,
sanctitas omnis refrixit. Hîc omnes ca-
codæmonis astus & conatus mirifice
desudant. Hoc agit, hoc laborat impi-
gre veterator, ut à frequenti Eucharistiæ
usu quam plurimos retrahat. Et quos
ille non ponit obices? quæ non fingit
impedimenta? quot obstacula molitur?
nunc fidei dubia ingerit; ubi non audi-
tur, fucatam reverentiam persuadet, aut
majorem in ea re gustum, si rarius fiat.
nunc plurimorum consuetudinem in e-
xemplum trahit, qui etiam boni Chri-
stiani sint, licet hîc infrequentes. modo
sermones hominum & dentes opponit,
modo molem negotiorum. jam inusita-
tas evagationes animi, angores consci-
entiæ, jam inimicitias & alterna inflam-
mat odia. huic aridam reddit mentem,
& ab omni cælesti sensu exsuccam, isti

præparationem efficit moleſtam, difficilem, tædio plenam. in alium totos variarum cogitationum exercitus immittit, ut vel ſic viam intercludat ad diuinum hoc epulum : ſunt, quos neſcio quo religionis prætextu decipit, ut ſaltem differant, quod non cenſent omitendum. ita mille fucos facit & tricas tricis neſcit malignus impoſtor; ita de die in diem confeſſionis & communionis ſacramentum differtur, ita mora moræ neſcitur, propoſitum propoſito adjungitur, & dies alius poſt alium cōſtituitur, ita hebdomades eunt & menſes & anni, cum ad Chriſtum non niſi rariffime, & fere inviti ac coacti venimus.

Luc.
c. 14.

I. Et cœperunt ſimul omnes excuſare. hic villam emit, hic boves; iſte uxorem duxit : nemo vacat, cum ad Chriſtum veniendum. palliolata hæc eſt & honeſta titulo, ſed re non parva infania. Et cur nec ad horulam quidem, curas villæ, boves præſepi, uxorem fornaci relinquimus, & nos ea agimus, quæ ſalutis noſtræ ſunt? ſi ad colendos agros, aut ad vineas paſtinandas vocaremur, eſſet cur dormire malleſmus quam fodere, at juſſi diſcumbere, & una cum Chriſto convivari, nec alium cibum quam Chriſtum ipſum ſumere, quod fuga tam agreſti nos ſubducamus, hoc demum dementiæ eſt inſignis aut impudentiæ.
Deum

Deum iratum si fugeremus, Adami ne-^{Gen.}
potes nos fateremur, sed Deum miseri- 3.
cordem & placatum, Deum vocantem
& ad paratissimam cælestiumque deli-
ciarum plenissimam mensam suavissime
invitantem sic averfari, hoc ferarum est
non hominum. Sed ut excusationes
nostræ suos habeant colores, culpam &
torporem nostrum non fædis aut illicitis
præteximus, non furta aut adulteria
caussæ nostræ, sed honestissima quæque
obtendimus, quid enim mali, conjugium
inire, rem familiarem curare, pecora aut
prædia emere? & quid vero in his, mi
homo, boni est, si nos hæc avocent à
summo bono, ab animi salute? sic cu-
randum est corpus, ne pessum eat ani-
mus; sic emenda est villa, ne perdatur
cælum. Ad cœnam magnam vocamur,
tantisper seponenda sunt cetera omnia,
dum adsumus vocati: quiescant inte-
rim & villa, & boves, & uxor, negotia
cuncta curæque fileant, dum nos in cœ-
na hac magna, cum Angelorum rege lo-
quimur, at nos eo sæpe impudentiæ pro-
gredimur, ut non vereamur dicere: *Non
possum venire.* verius diceremus: *Nolo ve-
nire.* ita pergite, mei Christiani, ita vobis
Deū conciliabitis. Ah, miserabiles & ne-
mini quam nobismetipsis damnosiores!
Algemus & ignem fugimus, ægri sumus
& medicum spernimus, cum tanto ma-
gis medico egeamus, quo minus ægros
nos esse sentimus: nimirum cepas &
allium

allium ore patulo inhiamus, fastidimus
 suavissimum Manna. Edixit olim Deus
Exod. per Moſen, colligeret Manna populus
s. 16. per ſingulos dies, ſolo ſabbato feriaretur. & nos noſtrum habemus Manna,
 idque longe præſtantius; illo frui licet
 dum vivimus, & uſque dum mors no-
 bis ſabbatum indicat. Sed & hîc pa-
 triſſamus miſeri. Adam, ait Gerson, è
 ligno vitæ edere noluit cum potuit: ju-
 re punitus eſt; non potuit cum vo-
 luit. ſic & nos dum poſſumus, adeo
 contumaciter nolumus, ut ad aliorum
 convivatorum menſas alioqui prom-
 ptiſſimi conſuamus, ſolum ad hanc di-
 vinam Chriſti menſam, non niſi ægre &
 raro pertrahamur. ſic in nullo ferme
 quam in ſalutis noſtræ negotio ſomni-
 culofius agimus; in ceteris alacres, hîc
 pigramur. Ad formicas Deus pigritiam
Prov. noſtram ablegans: Vade, inquit, ad for-
s. 6. micam ô piger, & diſce ſapientiam. illa
 cum naturæ ductu præſciat, cibos hieme
 non poſſe colligi, æſtate quærit, quæſi-
 tamque annonam ſervat hiemi. hoc &
 nos ſtudioſius deceret facere. Immor-
 talitatis alimoniam proponens Chriſtus:
 Si quis manducaverit, inquit, ex hoc pa-
 ne, viver in æternum. Ad æternam hanc
 vitam prædeſtinati, quamdiu mortis
 hiemem non ſuperarunt, vitalem hunc
 cibum aſſidue quæunt. Et hoc ipſe vo-
 luit qui dedit ſanctiſſimum iſtud Sacra-
 mentum, non tantum adorandum ſed
 &

& manducandum, ut cibum: cibo idem-
idem repetito vitam tuemur corpori,
liquin ab infito nobis calore consu-
nendi; cibo etiam frequentius sumpto
nimæ servāda est vita, aliter ab impuro
oncupiscentiarum æstu pessime depa-
cendi. ideo D. Innocentius monet: Ca-
endum esse, ne, si nimium hujus Sacra-
menti sumptio differatur, mortis peri-
ulum incurratur. idem omnino mo-
ens D. Hilarius: Timendum est, inquit, ne
liu abstractus à Christi corpore, alienus
emanat à salute: qui peccare quie-
erit, communicare non desinat. Sed
hoc ipsum est quod volumus, hæc nostra
unt impedimenta: communicare po-
ius definimus, quam peccare cesse-
mus, hanc potius mensam vitamus, quā
etulantiam nostram; ad sanctos castos-
que mores nec sic quidem suavissime
luci sustinemus. serpenti olim, Deos
nos fore mentienti credidimus, nunc
Deo nos in se mutandos affirmanti vix
idem habemus. promittit Christus, qui
manducat meam carnem & bibit me- *Ioan.*
um sanguinem, in me manet & ego in *c. 6.*
eo. audimus promissum, at lentissime
credimus. præcipit Christus hoc facien-
dum in mortis suæ memoriam, nec du-
bium quin eam velit esse quam creber-
imam: præceptum nobis videtur æ-
quū, sed, contra quam Christus voluit,
non crebro exequendum. Suadent o-
mnes Sancti Patres, hanc mensam fre-
quenter

quenter accedere ; consilium illorum non displicet, sed prævalet consuetudo nostra. Prælucēt tot pii homines exempli sui facem; videmus, non sequimur.

II. Si, quoties Eucharistiam quis sumit, toties mille nummum aureorum adjiceretur auctarium, suasoriis verbis nil opus foret amplius, rationes has aureas nemo non caperet; arcenda esset multitudo non accersenda. heu humanam cæcitatem! aurum cernimus, & capimur; latentes Eucharistiæ thesauros quia non consideramus, spernimus. Arenularum pauxillulum est omne aurum, si huic gemmæ conferatur; pretium illius nemo satis æstimaverit. Eucharistia peccata leviora delet, graviora cavet, impetus animi vitiosos enervat, intelligentiam illustrat, voluntatem incitat; conscientiam exhilarat, contra cacodæmonem armat; in adversis ne deficiamus roborat; in prosperis ne cadamus adjuvat, in meliore tramite ut progrediamur confirmat; Eucharistia dat pignus futuræ gloriæ, & cum eo simul mortis contemptum, cœli desiderium, affectuum moderationem, vitiorum horrorem, virtutum amorē, sui ipsius victoriam, in recte cœptis perseverantiam.

Sed animus, inquis, mihi aridus, vanus, frigidus, immundus est; non audeo accedere. Aut nulla hæc est excusatio aut mala, eoque minus differendus accessus,

cessus, quo magis es talis. Immundus es? accede; Eucharistia fons est puritatis. æger es? medicina est, & certissimum omnium animi morborum antidotum. Esuris? en panem angelorum. Letali torpes gelu? ne differ, hîc ignis est. tui te hostes exercent? ne diffide, hîc panoplia & armamentarium est instructissimum. tristis es & mœrore consumeris? hîc vinum est quod lætificat cor hominis. delicias quæris? nusquam veniores sunt, quam in hoc epulo, quod delicias præbet etiam regibus. Patriam adspiras? en viaticum. pretiosior tibi datur viatica cœna ad cœlum tendenti, quam Eliæ ad montem Horebum eunti. Quod si sanguinis fluxum stitit illico, Christi vestis vel tacta tantum, quid Christi corpus non poterit? Sed indignus sum, inquis, qui toties pascar tam divino cibo, nec dignam adversus illum reverentiam exhibere possum. Obsecro, Christiani, pigritiam nostram reverentiæ nomine ne coloremus: Melius est ex amore accedere, quam ex timore abstinere, inquit D. Thomas. D. Ambrosius, verba Domini, *Panem nostrum quotidianum da nobis hodie*, de Eucharistia interpretatus: Si quotidianus, inquit, est panis, cur post annum illum sumis? accipe quotidie, quod quotidie tibi profit. Sic vive ut quotidie merearis accipere: qui enim non meretur quotidie accipere, non meretur post annum accipere. Si enim

Par. 3.

4. 80.

A. 10.

ad 3.

l. 5. de

Sacra.

c. 4.

lib. 4. enim quotiescunque (inquit loco alio)
de sac. sanguis Christi effunditur , in remissio-
c. 6. nem peccatorum effunditur , de beo sem-
 per illum accipere , ut mihi peccata di-
 mittantur ; qui semper pecco , semper de-
lib. de beo accipere medicinam. Gennadius
dogm. Massiliensis : Quotidie , inquit , percipere
Eccles. Eucharistiam , nec laudo nec vitupero ,
c. 53. omnibus tamen dominicis diebus com-
 municandum suadeo & hortor , si tamē
 mens sine affectu peccandi sit . quæ præ-
 cipi posset facilior præparatio , quam af-
 fectum ad flagitia ponere , hoc est , deinceps Deum odisse nolle . certe nimis il-
 liberalis est in suum conditorem , qui
 hoc pestilenti ad turpitudinem affectu
 carere non vult in gratiam sui condito-
 ris . His talibus non immerito iratus
 paterfamilias : Dico vobis , inquit , quod
 nemo virorum illorum gustabit cœnam
 meam . quid ais Domine ? illimet ipsi
 sunt , qui cœnam tuam gustare nolunt ,
 & id tu eis in contumaciæ supplicium
 statuis ? ita prorsus , id quod ipsi volunt ,
 sit ipsis in pœnam , & pessimum eorum
 velle , sit ipsis in supplicium . Cum gravi
 fame laboraret Samaria , & Elisæus vi-
 lissimam annonam rei frumentariæ pro-
 pediem futuram promitteret , unus è re-
 giis satrapis ut vanum hoc vaticinium
ib. 4. irridens : Si nubes , inquit , prægnantissi-
Reg. 7. mæ frumento pluant , nunquid ideo fa-
 rina tam vilis erit pretii ? Cui Elisæus :
 Videbis , inquit , oculis tuis , & inde non
 come-

comedes : omnia ex ordine sunt facta. Multorum hodieque pœna hæc est , vident divini panis abundantiam , sed inde non comedunt. videbis , frigidissime Christiane, sub re divina panem hunc in altum attolli, sed inde non comedes; videbis per plateas ad ægros deferri , sed inde non comedes ; videbis plurimos illo in templis refici, sed tu inde non comedes : exclusus es ab hac mensa, quia teipsum exclusisti.

III. At vero prædestinati, velut germani Dei filii, hoc pane diu carere, gravissimam patris iram interpretarentur, ita nullam illius fruendi occasionem negligunt, non enim nesciunt quam benigne providentissimus Deus cunctis animantibus suum cuique cibum pararit, quilibet aves, leonibus feras , equo avem, bovi fœnum, gramen ovibus, ceteris piscibus , homini panem è terra, si qui hominum velint esse filii, panem è cœlo. Hunc illi cœlestem, hunc filiorum, hunc angelorum panem, magno desiderio, submissa reverentia, ardente affectu suscipiunt creberrime, maluntque pie impudentes filii quam male verecundi hostes videri. Ex horum prædestinatorum numero si quem Christus in magna hac cœna sic alloquatur: Attende quid amore tui pro te fecerim. Spinas in capite tuo non numerabis, non item dolores alios in corpore. Flagella & clavi corpus meum

meum fauciarant, at vero cor meum injuriæ innumeræ. Ipsam pæne mortem pro te passus sum in horto, angores me prius flagellarunt quam milites. Tuum jam est cogitare, quid hostes fecerint, cum etiam amicissimi læderent. scis, in quam duro lectulo pro te mortem obierim. Amor meus (ut disceres, quantus fuisset) acerbissima omnium & ignominiosissima morte defungi voluit, sed ignominiosior illa crucis & acerbior reperiri non potuit. En, pro te mortuus sum, & millies pro te mori non recusassem. Tu vero pro me quid patieris? si vis ut meus in te amor sit perpetuus, fac ut sit mutuus, amantem te ama. Ego te amavi ad mortem, ad crucem usque, & quousque tu me amabis? Quis prædestinatorum illorum non sincerissimis infusus lacrimis responderat? Etiam ad mortem usque, ô mi amantissime Domine, etiam ad ipsam usque crucem te amabo, si sic tibi placeat. Et quis mihi tribuat, ut ego moriar pro te mi Iesu, ô Iesu mi suavissime? quis ego sum, ut pro te mori sim dignus; & quis tuus hic est amor, ut hæc pati, ut sic mori pro me, sine me, ô vita mea, volueris? Hi tales gemitus, castissima hæc suspiria crebræ communionis, epulatoria solent esse colloquia; sic animus Deo suo intime unitur.


Et idcirco communionē crebrā (modò
sinceros ea habeat affectus, etsi nō ardē
tissi.

tissimos) magnū prædestinationis signū
ponimus . Verum , quidquid vel libri
clament, vel cathedræ, pars magna Chri-
stianorum tam gravi malæ consuetudi-
nis veterno premitur, ut nullis piorum
exemplis , nullis sanctorum monitis
excitari queat, & ad frequentiore[m] sa-
cramentorum usum permoveri.

O Christiani quæ glacialis rupes,
quod letale frigus pectora vestra con-
tringit, ut sic refugiatis amœnissimum
nunc solem ? non advertitis , hoc meras
esse technas cacodæmonum , qui omnē
divini amoris ignem in nobis cupiunt
extinctum, ut hoc animi pessimo frigo-
re obrigescentes, vivamus velut mortui,
pereamus in fordibus, nec in illam vivo-
rum regionem perveniamus? At qui per-
everanter Christum amat, nil magis
quam sæpe cum Christo esse desiderat,
ut verissime dixerit Cassiodorus: Inau-
dita est dilectio quæ amicum amat , &
præsentiam ejus non amat.

SYMBOLVM. IV.

Renunciatio omnium



*Quæ mihi fuerunt, lucra; hæc arbitratus
sum propter Christum detrimenta:
ad Philipp. 3.*

QVARTVM

PRÆDESTINATIONIS

SIGNVM.

SYMBO LV M IV.

AL TARE NV DV M ET DE-
 V E L A T V M. Per quod signifi-
 catur *Renuntiatio omnium*. Pro-
 clamat Servator noster: Qui non re-
 nunciat omnibus quæ possidet, non
 potest meus esse discipulus. Renuncia-
 re iussit omnibus, suavit relinquare om-
 nia. Ita dicat qui Christiani sangui-
 nis est: Pauperrimus esse malo quam
 Dei inimicus; malo bonis omnibus,
 quam divina gratia spoliari.

Paupertas multos fecit mercatores
 non aromatum aut panni, sed cœli.
 Simile est, inquit Christus, regnum *Matt.*
 cœlorum homini negotiatori, quæren- *13.*
 ti bonas margaritas; inventa autem una
 pretiosa margarita, abiit & vendidit
 omnia quæ habuit, & emit eam: mer-
 cator iste non damnum censet, sed
 maximum quæstum, omnes opes suas
 misisse: imo certe non amisit, sed ven-
 didit, quia pro illis maximi pretii gem-
 nam recepit. reculas suas dedit, &
 Christi chirographum acquisivit, quo
 C 3 uno.

uno erit olim beatissimus : aurum contempnit , & totum sibi cælum jam habet oppigneratum : prædiola sua non deseruit , sed paratus erat deferere , & amplissimum sibi regnum comparavit. Qui margaritam habet , inquit Chrysostomus , novit se divitem esse , etiam si ignotum illud sit , cum parvo in loculo margarita recondatur. Certe negotiandi causa vivimus , non otiandi. neque ullus tam rerum egenus est , qui hanc gemmarum mercaturam nequeat facere; Nos enim quærit Deus , non sine nobis nostra , inquit Augustinus. neque vero etiam ullus tam abundans rerum est & dives , cui difficile videri debeat , emendis unionibus illis , parvi facere sua omnia. Mercatus hic non exigit , ut opes amittat , sed ut paratus sit , si necesse , amittere ; negotiationis hujus ratio non est , ut pecuniam omnem eroget , sed ut , si opus , malit animæ parcere quam pecuniæ , & multo promptius mendicus esse velit quam Dei inimicus . non enim animam pro pecunia , sed pecuniam pro anima deponere convenit , seu sponte largiendo , seu patienter amittendo. Et hoc esse signum prædestinationis affirmamus. huc nos non tantum Christiana fides , sed & ratio ducit.

*lib. E-
vang.
qq. in
Matt.
4.13.*

I. Stilpon capta patria , ereptis liberis , amissa uxore , cum ex incendio publico solus & tamen beatus exiret , interroganti Demetrio , nunquid omnia perdidisset ? Nihil, aiebat, perdididi ; omnia mea sunt mecum. Idem, amissis omnibus , ausus est dicere Bias : pectore enim illa gestabat , non humeris , nec oculis videnda , sed animo æstimanda. Hoc generosi pectoris nota sit in idololatra, in Christiano certæ *prædestinationis* signum est ad vitam. Ille Christo facit stipendia , qui cum amisit plurima , dicere tamen audet: Omnia mea mecum porto: Deus meus, & omnia.

Sanctissimum virum , Franciscum Assisinatem accepimus , noctes ipsas, quatuor verbulorum horum commentatione & creberrima repetitione, summa cum animi sui voluptate transegisse. Sanctissimum hunc virum liceat imitari, & in omni egestate gloriari: *Deus meus , & omnia.* Alii alia quærant , alia desiderent , aliis oblectentur: unum ego Deum quæro , Deum desidero , Deo meo delectabor , *ô Deus meus , & omnia!* opes aliis & honores, voluptates aliis universas relinquo : Deum ego habeam , & omnia habebō. Totos ego aliis mundos concedo; aureos & gemmeos montes non invidéo ; exquisitissimas eorū delicias non

C. 4 ambio;

Matt.
17.

ambio; mihi Deus meus est omnia. Nihil ita bonum, nihil ita pulchrum aut jucundum est, quin summum illud, & primum, ac supremum bonum, & melius, & pulchrius, ac amœnitate incomparabili sit jucundius, *ô Deus meus, & omnia!* quam varia sæpe accendunt desideria, quam diversis quandoque ignibus ardeo, quam multis æstuo cupiditatibus? ita ut cum lunatico illo adolescente, modo in ignem, modo in aquam rapiar. Sed quænam illa tanta bona sunt, quæ ego tam anxie appeto? heu vana, fluxa, sæpeturpia, & quæ non possunt esse diuturna, sic ut suum dominum & amatorem vel moriendo prævertant, vel deferant morientem. Deus meus, amor meus, gaudium meum, & mea omnia, quid tandem est quod appetere possum, cujus loco non tu mihi sis, *ô Deus, & sis omnia?* mihi cibus, mihi potus, mihi quies, mihi gaudium & voluptas, meus mihi maximus honor est Deus, Deus mihi omnia, & plus quam omnia. nam etsi cibus, quos inhio, vesci: potu, quem cupio, refici: voluptate, quam ardeo, frui liceat: quid tamen istud vesci, quid istud frui est & refici? *Deus meus, & omnia*, te frui, à te refici, est perfectissime recreari, est frui omnibus bonis. At interim premit labor, dolor affligit,

affligit, curæ distrahunt, opes minu-
unt, favor subtrahitur, vita decrescit,
homines turbant & exagitant. Nihil *Astor.*
horum vereor, proclamat Paulus, nec ^{20.}
facio animam meam pretiosiores quam
me, dummodo consummem cursum
meum. neque enim hæc omnia, etiam-
si simul ingruant, mala sunt, si sum-
mum illud bonum opituletur, Deus:
Deus meus, & omnia. tu mihi ô bone
Deus, ô bonitas, in ipsis laboribus
es quies, in doloribus voluptas, in cu-
ris securitas; in paupertate vera es o-
pulentia; tu mihi ab omni hominum
insultu, propugnaculum es tutissimum,
tu mihi, quicquid malorum fugiam, es
refugium; tu mihi es omnia, quæ-
cunque tandem desiderare possum, vel
optare. Omnis copia quæ Deus meus
non est, egestas mihi est. quid impu-
ros rivulos sectemur? ipsum fontem
habemus, eumque limpidissimum:
Deum habemus, omnia habemus, quæ-
cunque habere concupiscimus. si quem
paupertas flagellat, si cui fortuna ira-
scitur, minus quidem is gaudet,
sed & dolet minus: suum
ab hoc fortuna repetere
non potest, nec alie-
num mors
auferre.

II. Huic tamen eo modo pauperi, felicitate non cedit dives ille, qui cum plurimum bonorum possideat, nihil amat: opes arca claudit, non corde; tristitia nequaquam extinguendus, etsi perdat universa. Nam sine dolore amittitur, quicquid sine amore possideretur: Quæ vero ardentem diligimus habita, graviter suspiramus ablata, ait D. Gregorius. Bonum quo quis vere bonus est, nemo invitus accipit, nemo amittit invitus, bonum enim censendum non est quod eripi potest. I nunc, Satan, & tabellarium te finge, nondum omnis patientissimi Iobi familia est extincta, etiamnum vivunt, qui renunciare possint omnibus: Curre ergo, nuncia tali, clama altum: Res tua & pecunia tua omnis est perdita. responsum nunc audi: Nisi ego illam, fortassis illa me perdidisset; jam in via ad cælum ero expeditior. Exoneravit me Deus, charo quidem sed periculoso pondere, & tutiore posuit loco, damnum non putabo, quod Deus mihi voluit esse remedium. Et cur me frustra & vane affligerem? habui ista tanquam perditurus: nunc ego magis meus sum, cum ista non sunt mea amplius. Auditis Christiani, audis Orciniana vulpes? sic sentit, sic & loquitur, quisquis cælo prædestinatus est, nec unquam tantum

tum bonorum potest perdere , quin
 liberam hanc vocem retineat : Iactu-
 ra non est , sed versura , cum lucrum in-
 gens dispendio levi comparamus ,
 cum terræ glebulis
 mercamur
 cælum.



SYMBOLVM.V.

Tribulatio perpetua
cum patientia.



*Beati qui nunc fletis ,
quia ridebitis . Luc. 5 .*

QVINTVM
PRÆDESTINATIONIS
SIGNVM.

SYMBOLVM V.

FRUTEX ROSARVM spinis
septus undique. Per quem monstra-
tur *Afflictio perpetua, & exercitatio
cum patientia.* Abraham Evangelico e-
puloni in flammis hoc signum opponit:
Recordare fili, quia recepisti bona in
vita tua, Lazarus similiter mala; in vita
tu lætabaris, Lazarus cruciabatur:
nunc tu cruciaris, lætatur Lazarus. sic
vertuntur vices certa Dei lege. *Patien-*
dum est, aut *hic*, aut *ibi* in alio prorsus
orbe & vere *novo*. Atlerutrum nunc ma-
ture eligendum; nemo evadit. D. Chry- *Orat.*
sostomus, Quem videris, inquit, virtu- *3. de*
tis studiosum, innumeris tamen affligi *Laza-*
molestiis, beatum hunc puta, ut qui *ro.*
commissa peccata hinc diluat, & illic pa-
ratam habeat mercedem.

Impossibile est ut qui malis indixerit
bellum, pressuris careat. Nefas est pu-
gilem Dei vacare deliciis, non licet e-
pulari luctantem: luctamen enim sunt
præsentia omnia, certamen, bellum,
pressura, angustia, stadium: aliud est
quietis tempus, hoc ærumnis deputa-
tum est atque sudoribus. Nullus, ubi ad
certamen se exuit, unctusque est, requi-
em quærit. Si enim requiem quæris,
cur

- Idem* cur te exuisti? cur libidinibus ac natu-
Chris. ræ bellum indixisti? Nihil horum te
epist. perturbet, siquidem illi in quiete, tu
2. ad in tentationibus vivas. Alioquin erroris
Tit. damnandum est beati Iacobi hortamen:
c. 3. Omne gaudium existimate, fratres mei,
Iac. I. cum in tentationes varias incideritis.
Sen. l. Nihil eo infelicius, cui nihil evenit ad-
de pro- versi. Argumentum est talem à Deo
vid. contemni ut imbellem & ignavum.
Dei. Amphitheatrum honoris est, inter ad-
 versa luctari. Certa beatitudinis tesse-
 ra est, posse in perpeffionibus gaudere,
 & circumlatrantibus undique malis,
 hilarem cœlo animum attollere, etsi per
 genas copiosæ fluant lacrimæ. Scivit
 equidem Christus nos ingenti ærumna-
 rum acervo locupletes, gaudium soli-
 dum, præter spem futuræ mercedis ha-
 bere nullum. & tamen tanquam beatis:
- Matt.* GAUDETE, ait, ET EXULTATE. At nos,
5. quoties vane lamentamur cum affligi-
 mur? sæpe puerilē in modum querimur,
 ac ad omnem pæne iētum trepidi expa-
 vescimus, nec agnoscimus paternam
 Dei & medicam manum vulnerantis,
 cum tamen & pueri sciant, vulnus quod
 à chirurgo est, medicamentum esse &
 initium valetudinis. Vt medeatur &
 fanet, vulnerat Deus, non ut jugulet.
1. Pet. testis horum beatus Petrus: Si quid pa-
3. timini, ait, propter iustitiam, beati, hæc
 est enim gratia, si propter Dei conscien-
 tiam sustinet quis tristitias, patiens in-
 iuste.

juste. quæ enim est gloria, si peccantes & colaphizati suffertis? sed si bene facientes patienter sustinetis, hæc est gratia apud Deum. ita & beatus Gregorius: Sæpe contingit, inquit, ut electus quisque, qui ad æternam felicitatem ducitur, continua hîc adversitate deprimatur. à cunctis despicabilis cernitur, & hujus mundi gratia indignus æstimatur: sed tamen ante occulti judicis oculos virtutibus emicat, vitæ meritis coruscat; honorari metuit, despici non refugit; corpus continentia afficit, sola in animo dilectione pinguescit; mentem semper ad patientiam præparat, & erectus pro justitia de perceptis contumeliis exultat.

I. Vere æterna providentia, hominē probum in delitiis non nutrit; experitur, indurat, sibi illum præparat, ita tamen ut simul ei promittat: Cum transferis *If. cap.*
per aquas, tecum ero, & flumina non *43.*
operient te: cum ambulaveris in igne, non combureris, & flamma non ardebit in te. Nimirum in undas immitit nos Deus & in flammis, uri sinit & mergi, æstu suos explorat & gelu, sed quos ad vitā prædestinavit, non comburi permittit aut submergi. Fidelis Deus *I. Cor.*
est, qui nō patietur vos tentari supra id *10,*
quod potestis, sed faciet etiam cum tē-
tatione proventum, ut possitis sustinere.
Eximie, si quisquam, de hac præde-
stina-

*Instit.
spiritu.
cap. 8.*

*Hom.
8. in c.
4. ad
Ephes.
Psal.
109.*

stinationis nota videtur sensisse Ludovicus Blofius, qui plenissime affirmans: Non est ullum, inquit, certius signum divinæ electionis, quam si quis afflictionem, vel quicquid adversorum à Deo immittitur, nō tantum repugnanter, sed submisſe atque patienter ſuſtineat, cum homini utilius nihil eveniat quam AFFLIGI. Et hic eſt ille inæſtimabilis gemmæ anulus, quo Deus deſponſam ſibi animam donat. tanti eſt, vel minimam moleſtiam pro Deo perpeti, ut Chryſoſtomus velut decretum proclamet: Nihil eſſe melius, quam male pati propter Deum. De torrente nunc electi bibunt in via, propterea caput exaltabunt in cœlo. Nunc deprimuntur & calcantur, ut olim aſſurgant & extollantur ad inſtar palmarum. Vult nos Deus probe ſcire, arduum eſſe bonum, & infinitum quod quærimus, pro quo obtinendo laboramus, ut veriffime dixerit Marcus anachoreta: Deus conſcius imbecillitatis noſtræ, nemini ſolet magni quid conferre, niſi prævia calamitate Moſen Deo vocanti obtemperantem, & aula egreſſum, glomerata clade invaſerunt paupertas, ignominia, contemptus, inſidiæ regis, pericula mortis, fuga, exilium. Electos Dei cerninus, inquit Gregorius, & pia agere & crudelia pati hinc ergo colligitur, diſtictus judex quanta illic feriat diſtictione quos reprobat, ſi cruciat quos amat. Erras, m

Chri

Christiane, erras, si cogitas te integrum & non bene contusum, perventurum ad cælum. Circumspice, & videbis, quod p[er]erun[que] qui ditiores sunt virtutum, locupletiores sint afflictionum: qui vitiis opulenti, crebro etiam numis & fortunæ favore. Nimirum pecudes macello destinatæ, liberrime saltant per pascua, aliis in opere sudantibus: sic & homines cœlo assignati, non lascivunt in pratis, sed hinc illinc gement in angulis, adeo ut verissime quoque Ludovicus Blosius ex magni viri ore pronunciet: *Quemcunque Deus potioribus donis exornare sublimiterque transformare decrevit, eum non blande & molliter lavare, sed otum in mare amaritudinis immergere conuevit.*

II. Galenus & Hippocrates retinere locuerunt animam & fovere, Christus disse docuit & perdere, ita ut quod dixisse fertur Themistocles, omnes olim cœlites sint dicturi: Perieramus, nisi periissemus. plurimis saluti est, perire: vera multi male perierant, nisi à Deo perdit bene periissent. hinc Paulus, cum perditus aliis, sibi tunc maxime 2. Cor. 12. constitutus videbatur: Placeo mihi, ait, in infirmitatibus, in cōtumeliis, in necessitatibus in persecutionibus, in angustiis pro Christo: cū enim infirmor, tunc potens sum. Bernardus quærendo Deo quasi peritigatus: Circumire, inquit, possum Domine

Sozom.
l. 5. c.
14.

lib. de
patien.
6. 13.

mine cœlum & terram, mare & aridam, & nusquam te inveniam, nisi in cruce ibi dormis, ibi pascis, ibi cubas in meridie. Igitur Dominum servi sequamur, & brevi molestia cruciatus æternos redimemus. Athanasius ab Iuliano Apostata in exilium abire iussus, cum Alexandriæ illacrimantes circa se cerneret Christianos: Bono animo, inquit, estote; nebula enim est, quæ brevi evanescet. Vere nebula solum est, quicquid horroris habet hæc vita, sed nebula brevi dissipanda, per æternam serenitatem. Prisci, si qui ex illis laboriosi, nullum diem volebant esse sine linea: Christiani, quotquot probi ex illis, nullum diem ire cupiunt sine nubecula, ut habeant semper quod amore sui domini patiantur. Iobo cœlum fuit non tantum nubilum, sed & ferreum, & tamen omnem patientiæ speciem, uti Tertullianus loquitur, adversus omnem diaboli vim expunxit, quem non abacti greges non filii uno ruinæ impetu adempti, non corporis cruciatus à patientia exclusit. Quale in illo viro feretrum Deus de diabolo extruxit? quale vexillum gloriæ erexit? cum ille homo ad omnem acerbum nuncium nihil ex ore promeret, nisi DEO GRATIAS? quid? ridebat Deus. Quid? dissecabatur Satan. hinc omnia duplicia recuperavit. Itaque dum patimur, grandi passu in patriam proficiscimur.

III. Diversæ ad cœlum viæ sunt, tutissima est omnium & certissima, regia via *crucis*. Per multas tribulationes oportet nos intrare in regnum Dei. Et uti vasa figuli probat fornax, sic homines justos tentatio tribulationis, sed in fornace ardet palea, aurum purgatur; illa in cinerem vertitur, illud sordibus exuitur. Fornax est mundus, aurum justî, ignis tribulatio, artifex est Deus. Quod si auro vox sit & sensus, sic loquitur: Quod vult ergo artifex, facio; ubi me ponit artifex, toléro. Ardeat licet palea ad incendendum & consumendum, illa in fumum abit, ut ego sordibus caream. Videte ergo paleæ, videte & vos qui aurum estis; in eodem igne palea fumat, aurum rutilat; in eadem afflictione improbus blasphematur Deum aut accusat, patiens laudat, & ex ipsis adversis vires sumit, uti ignis qui flatu impetitur & crescit, atque unde extinguendus creditur, inde roboratur. Crescit adversis agitata virtus. Numera mihi ab orbis incunabulis omnes Dei amicos, & in omnibus hanc *prædestinationis* notam reperiēs. Deus tentavit eos, & invenit illos dignos se. Abraham exercetur varie & affligitur, Ioseph à fratribus venditur, David à filio iniquissima patitur: Isaias ferra medius secatur, Ezechias eliso cerebro per saxa raptatur, lapidatur Hieremias, Michæas gladio feritur, Amos secundum tempora clavo

transfigitur, Daniel leonibus objicitur, Naboth saxis obruitur: Elisæus deridetur. Iob ulcerosus, etiam conspuitur, Tobias excæcatur, Susanna innocens damnatur. paucos dixi. & quid malorū non subiit Paulus? Apostolorum ceteri flagellantur, crucifiguntur, necantur. Nemini suorum parcit Deus, quē enim
Hebr. diligit Dominus castigat, flagellat autem
 12. omnem filium quem recipit, omnē, om-
 2. *Tim.* nem. Omnes enim qui pie volunt vivere
 3. in Christo Iesu, persecutionē patientur.

IV. At hoc habet pro certo omnis
Tob. 3. qui te colit (ô Deus) quod vita ejus si
Tob. 7. in probatione fuerit, coronabitur, quia post tempestatem tranquillum facis, & post lacrimationem & fletum, exultationem infundis. Ergo beatus homo qui
 2. *Tim.* corripitur à Deo. si enim sustinemus &
 2. conregnabimus. Quare nemo flagellari timeat, sed timeat exhæredari. ad hæreditatem æternam flagellis erudimur, ne, dum delectamur in via, obliviscamur quod desiderabamus in patria. Si exceptus es, inquit Augustinus, à passione flagellorum, exceptus es à numero filiorū. Noli esse iniquo sensu & puerili, ut dicas: Plus amat pater meus fratrem meum, cui permittit facere quicquid vult, quam me, quia si me movero contra ejus jussionem, flagella invenio. potius gaude sub flagellis, quia tibi servatur hæreditas: illis ad tempus parcit, quos

quos in æternū damnabit. Tanquam per
amœna prata ad carcerem venit, qui per
præsens vitæ prospera ad interitū cur-
rit. Observant aliqui rosam juxta allium
plantatam reddi fragrantiorē. suas habet
& cœlestis hortulanus fragrantissimas
rosas, homines paradiso destinatos. Has
ipse rosas plerunque sic plātat, ut noxia-
rum herbarum vicinia illis sit toleranda,
quo enim quisque probior, hoc in eum
improbiorum insultus audacior, hoc etiā
variarum ærumnarū incursus crebrior.
Sic fragrantia rosarum, allii foetoribus
est acuenda. Quin & hoc ajunt, rosam
quæ per artem sine spinis nascitur, etiā
sine odore esse: virtutū odor, præsertim
patientiæ, fragrantia nulla est, ubi nulli
sunt rerum adversarū aculei. Nemo sa-
ne quantum profecerit nisi inter adver-
sa cognoscit: nondum se nosse cœpit, qui
necdum cœpit esse miser. Noctu lucent
stellæ, de die latent; sic vera virtus quæ
 sæpe in prosperis non apparet, in adver-
sis eminet. Nec tam placent cœlesti
Domino famuli rebus præclare geren-
tis, quam adversis alacriter & cum fi-
lucia perferendis. Aquila pullos suos
objectu solis explorat, metalla argenta-
rius coticula, Christus famulos suos ca-
mino afflictionis. Præ Romanis ergo
potiori nos jure dicimus: *Et facere &*
pati fortia, hoc Christianum est, nam qua
ia caput præcessit, hac subsequendum
est membris.

SYMBOLVM.VI.

Auditio verbi Dei.



*Audiens sapiens sapientior
erit. Prouerb. 15.*

PRÆDESTINATIONIS

SIGNVM.

SYMBOLVM VI.

FICVS. Quam Christus in suis concionibus non tantum nominavit sæpius, sed quæ divino verbo iussa comas ponere & exarescere, momento paruit. fidelem diceres divini verbi auditricem, ideo hac designatur *Auditio verbi Dei*. An non illustre hoc Prædestinationis signum ex ore Christi? Qui *Ioa. 8.* ex Deo est, verba Dei audit. eximie id declarans Ambrosius: Quomodo, inquit, possunt verba Dei dulcia esse in *in Ps. 118.* faucibus tuis, in quibus est amaritudo nequitiae? Facile agitur quod libenter *Isido.* auditur. sed illi veri sunt divini verbi *soliloq.* auditores, de quibus Servator: Beati, inquit, qui audiunt verbum Dei, & custodiunt illud. Frustra custoditur memoria, quod non custoditur & vita. Sunt qui audita sic retinent ne obliviscantur, hoc tamen agunt vivendo *Aug.* ne corrigantur. Mens prædestinati di- *in Ps. 118.* vina & sacra cupide anhelat, seponi iubet negotia, ludos abrumpi, epulas etiam quandoque deferi præcipit, ad templum, ad concionem urget, nec excusationes admittit, pluvium cœlum non metuit, serenum etiam negligit,

- aprico & campis, templorum fornices præponit, fatagit audire, nec satiatur
Ecclef. auditis. Auris bona audiet cum omni
e. 3. concupiscentia sapientiam, quæ utique certior haberi nequit quam è verbo Dei.
Serm. Quærit anima Verbū, inquit Bernardus,
85. in cui consentiat ad correctionē, quo illu-
Cant. minetur ad cognitionē, cui innitatur ad virtutem, quo reformetur ad sapientiā, cui conformetur ad decorem, quo fruatur ad iucunditatem. Animus hoc cibo pastus, quoties cum Hieremia propheta succlamat? Inventi sunt sermones tui, & comedi eos, & factum est mihi verbum tuum in gaudium & in lætitiā cordis mei. Nam D. Chrysostomo teste, uti esurire signum est valetudinis in corpore, sic amare divina eloquia, indicium maximum sanitatis in anima.

I. Et quis eum credat valere animo, qui averfas à veritate aures, ad fabulas laxissime finit excurrere, & dum in templis vitia verbis castigantur, ille factis domi exercet, & in piæ exhortationis vicem, vel calicem trahit, vel fritillum & tesseras movet, aut otiosis ambulatiunculis diem imminuit, aut cum canibus agros & silvas pererrat, aut dum concionator in suggestu sudat, ipse languidissimus dormitator, adhuc dū inter plumas volutatur, nec erubescit somniculosus glis, à sole jam pæne meri-

meridiano, in plumeo sepulchro deprehendi. turpe est de Christianis hoc scribere, sed longe turpius Christianos hoc facere. hæc signa non sunt nisi pereuntium: longe aliis noscuntur prædestinati. Factum est autem, ait Lucas, cum *Luc.* turbæ irruerent in eum, ut audirent *6.5.* verbum Dei &c. Non synagogis aut templo, sed nec civitatis mœnibus hæc audiendi sancta fames coerceri poterat: in camporum amplissimam planitiem sese effundebat. sed nec solitudines horrebant viri fæminæque, modo liceret audire concionatorem eum quem sequebantur quoquo ibat. Nos templis vicini habitamus, & sæpe nec pedem movemus audiendis iis quibus meliores fiamus, nedum ut impransi & incoenati ad solitudines, ad mare properemus, ita fit ut plerunque nihil magis fastidiamus quam divina. hoc ævo sane non desiderantur qui dicant, sed qui audiant: concionatorum satis est, non ita semper auditorum. sexcentas ingimus absentiaë causas: nec desunt qui audire nolint ideo, ne forte dormientem excitent conscientiam: qui enim verum novit, etiam se judicem formidat, & tribunal horret propriaë conscientiaë.

Deflevit Hieremias, vias Sionis lugere, eo quod non sint qui veniant ad solennitatem: non minus viæ ad templa

sæpe nunc lugent, dum in viis ad tabernas plauditur. non densæ nimium concursationes fiunt ad auditionem divinæ legis : at si ridiculus histrio novam spectaculi venustatem promittat, si nuptialis pompa per urbē incedat, si nundinalis curiositas alliciat, mox usum pedum recipimus, & quicquid oculorum habemus, adferimus ; cōcurritur

2. *Par.* insolita stipitatione. Dei vero nuncii si
c. 36. non ut olim subsannantur, certe parvipenduntur sermones illorum, quod graviter pagina sacra queritur.

Non quidem negandum est, multos esse qui conciones audiant, sed & illud tamen fatendum erit, paucos esse, qui animo desiderent, à concione audita redire emendatiores. Aures habent, manibus carent, audiunt & non faciunt. Non abeunt inde vel tantillo meliores. Sunt qui audiant, ut piæ curiositati non obstant, alii ut tempus fallant, quidam ne peccent in consuetudinem : isti ut doctiores fiant non ut meliores, hi ut charos oculos, quos alibi minus commode possent, in templis videant; at isti ut videantur, & aliorum in se oculos convertantur : sunt qui dicentis vocatione excipiant in risum aut calumniam; sunt etiam qui confabulaturi, aut certe dormituri accedant, aut aures præbituri sed jam onustas. Pauci sunt, & ii demum vere probi auditores, qui animum adferunt

runr excipiendis monitis paratissimum, nec aliam ob causam veniunt, quam ut recedant seipsis meliores : non scholæ discunt, sed vitæ; audiunt utraque aure vincti, nec unquam facile audire desinunt, nisi virtuti jam procliviores. Nemo adeo ferus est qui non mitescere possit, si modo culturæ patientem aurem accommodet. Et Christi oviculæ ab alienis dignoscendæ, cauma seu signum in aure gestant; verbum divinum avide audiunt, & obediunt.

II. Norunt prædestinati quam sollicite monuerit Augustinus : Non minus reum esse qui verbum Dei negligenter audierit, quam qui corpus Christi in terram negligentia sua cadere permiserit. Non ergo tam attendendus est, qui dicit, quam qui dictat, & dicenda imperat Deus. Ego quid sum, inquit Augustinus, nisi cophinus seminatoris ? Ille in me ponere dignatus est, quæ vobis spargo. nolite attendere ad vilitatem cophini, sed ad claritatem seminis, & potestatem seminatoris. Christianus ubique invenit quod discat, semperque proficiat, atque hoc etiam suæ prædestinationis indicium agnoscat, sedere ad pedes Domini, & cum Magdalena audire verbum Dei; neque ob domestica ministeria, nec ob sororis murmura, non etiam ob amicissimorum avocamenta,
ab

Hom. 26. in lib. 50. hom.

ab ore loquentis pendentem avelli posse. Neque vero electionis nota est, audire tantum, sed & meminisse, sed & exequi. quorsum est comedere, si quod comestum, mox indigestum revomatur? in Christi matre maximæ laudis erat,

Luc. 2. quod conservavit omnia verba hæc, conferens in corde suo. In corde meo, ait psaltes regius, abscondi eloquia tua, ut

Luc. 8. non peccem tibi. Terræ bonæ conferuntur ii, qui in corde bono & optimo audientes, verbum retinent, & fructum afferunt in patientia. Nam uti legere, & non intelligere, sic audire & audita memoria non custodire, ferme tantundem quod negligere est. otio abutitur pictor, qui lymphatis coloribus quidlibet in tabella, magno studio pingit, quod mox spongia detergat: sic turpe Christiano est, audire, & mox omnium oblivisci. sic meminisse conetur, ut memoria non sit ignava, sed efficax & strenua, quæ fieri urgeat, quod meminit faciendum. Si hæc scitis, beati eritis, si feceritis ea.

Ioan. 13.

SCIVISSE neminem ad cœlum extulit, sed FECISSE; facere autem non vult, qui recusat scire facienda. Fons sciendi purissimus, libri divini. Et quamvis ex eodem divinæ scripturæ fonte diversi hauriant, idque sæpius, nemo tamen unquam poterit totas has opes eruere. Ea est hujus opulentiae natura, ut quo foderis altius, hoc magis exundent di-

vini sensus; fons est nunquam deficiens. *Serm.*
 Quemadmodum vero formica pabulū *4. de*
 in hiemem æstate sibi colligit, sic Chri- *Lazar.*
 tianus in tranquillo verbum Dei exci-
 pit, ut inde in rebus turbidis pascatur.
 Constat, eos qui hac in re contempto-
 res, sic quandoque puniri à Deo, ut &
 ipsi sentiant se puniri, & videant alii.
 Alium ab alio doceri, alterum alteri
 submitti vult Deus. Sapientissimus erat
 ex David, præceptorem in plurimis ha-
 bebatur Spiritum sanctum, probe sciebat
 adulteria & homicidia esse vetita, & ta-
 men poenitentiam prius non egit, quam
 e ea differentem Nathanem audiit.
 Christus Paulo è nubibus concionatus *Act. 9.*
 est, & tamen erudiendum illum ad A-
 naniam misit. Cornelio nunciavit An- *Act.*
 gelus, preces ejus & eleemosynas Deo *10.*
 probari, sed simul ei Petrum à quo in-
 trueretur, monstravit. Regina Canda- *Act. 8.*
 res quæstori Isaiam in curru legenti, nō
 angelus in præceptorem, sed Philippus
 Deo assignatus est. Moses, quem jure *Exod.*
 diceres Deo à secretis fuisse, & supremū *18.*
 intimumque Numinis consiliarium egis-
 se, nihilominus à socero suo tametsi alic-
 gena instituitur velut puer, nec sine a-
 lii verborum castigatione, modum do-
 cetur gubernandi populi. Christus ip- *Luc. 2.*
 se, æterna sapientia, medius docto-
 rum sedet, & interrogat. Nullus ho-
 minum sexus, nullus ordo & status,
 audi-

audiendarum concionum immunis est.

III. At inter doctos, inquis, censeor : nil novi audiam ; quæ dicturus est Ecclesiastes, jam ante scio. En humani ingenii eruditam superbiam ! & quis eo pervenit ætatis & doctrinæ, ut non plura nesciret quam didicisset ? Sed fac, omnium te esse doctissimum, nec doctiorem è concione rediturum : ita quidem intelligentia antecelles omnibus. Sed quid voluntas & memoria ? an non movenda illa & inflammanda, monenda ista erit & juvanda ? memoriæ facillimum est falli, pronissimum voluntati errare, nisi quotidianis subsidiis dirigantur, illa ut firmetur, hæc ut ab erroribus liberetur. Ergo non utile tantum, sed & necessarium est omnibus, conciones audire ; malis, ut corrigantur ; bonis, ne corrumpantur ; ignaris, ut doceantur ; doctis, ut commoneantur, & ut nova discant, aut certe vetera memoria recolant : Audiens sapiens sapientior erit, & Auris sapientium quærit doctrinam. Herodes multis sceleribus clarus, tam barbarus tamen, aut fatuus non fuit, quin aulicum concionatorem suum, & libenter audiret, & audito eo multa faceret. In Herode non libentia tantum audiendi fuit, sed & longa quoque patientia. multa enim ex Ioannis concionatoris sui præscriptione facere non

potuisset, nisi concionatorem sapius, & de multis audiisset, neque per catalogum duntaxat enumerando, vitia regis Ioannes castigasse censendus est, sed rationibus & copiose egisse, ut non tantum indicaret mala, sed & potenter dissuaderet. Non poterant regis adulterium, & tot ejus flagitia, unica Ioannis concione satis elui. singula singulas conciones, imo singula plures exigebant, mens sceleribus obfirmata, crebro arietate quatienda erat: Et tamen *libenter eum audiebat*. Et quamvis ei Ioannes in os & in faciem objiceret publice: Non licet tibi habere uxorem fratris tui, idque oratione indubie longa probaret, tamen *libenter eum audiebat*, tantum in Herode fuit audiendi studium, nec detulit Ioannes; cetera omnia Herodis facinora filitio politico non involvit. clausus testis beatus Lucas: Herodes autem, *Luc. 3.* inquit, tetrarcha cum corriperetur ab illo, de Herodiade uxore fratris sui, & de omnibus malis quæ fecit. itaque Ioannes in Herodis tyrannidem, in cædes, in tributa tam avare collecta quam prodige in omnem luxum dissipata inhebeatur libere, & tamen *libenter eum audiebat*. tanta in Herode fuit concionatorie objurgationis patientia, ut non prima illa vehementiore, non secunda, nec tertia, non multis concionibus sequentibus fuerit offensus, *libenter eum audi-*

audiebat. Herodi Ioannes nunquam neque nimis sæpe, neque nimis prolixè, neque nimis simpliciter aut populariter, neque severe nimis, aut acerbe visus est concionari, *libenter eum audiebat, & auditò eo multa faciebat*, modo facere perverasset, queri certe non potuit quod fortuna sibi veritatem invideret. queritur id olim Seneca, & Monstrabo, inquit, tibi, cuius rei laborent magna fastigia, quid omnia possidentibus desit, Scilicet ille qui verum dicat. Non vides, quemadmodum illos in præceps agat extincta libertas, dum nemo ex animi sui sententiâ suadet dissuadetque, & unum amicorum omnium officium est, una contentio, quis blandissime fallat. Non fefellit Herodem Ioannes, tam candidi pectoris, tamque aperti oris monitorem se præstitit, ut nil minus posset visus, quam veritatem tacere. regias aures assidue vellebat, quibus & flagitium illud identidem occinebat: Non licet tibi, Herodes, non licet tibi. Vbi mihi nunc illi delicatuli & prurientes auribus, qui si uno verbulo, etiam sæpe detorto & perperam intellecto, notatos se putent, & concionatorem execrantur, & cathedram. Herode parricida & adultero, nescio an in hoc non deteriores sint, qui quamvis vitia, ut ipse, non fugiant, fugiunt tamen conciones quæ vitiiis medelâ faciunt, quod non faciebat

Hero-

lib. 6.
de be-
nefic.
c. 3.

Herodes. Seductori dat manum qui dare diffimulat præceptori, & stulto discipulum committit, qui se solum pro præceptore agnoscit. quisquis jam adeo sibi sapit, ut neminem docentem audire nisi se dignetur, plus elationis ostendit, quàm eruditionis. nec potest in eo virtutis esse amor, in quo cœlestis doctrinæ odium est, aut neglectus. Initium recedendi à Deo, est fastidium audiendi divina, nec Deum diligit, qui pia monita non esurit. Lapis lydius explorat aurum, Euangelium Christi revelat cogitationes hominum.



SYMBOLVM.VII.

Eleemosyna cum
benigno affectu.



*Vnicuiq; mandavit Deus de
proximo suo. Eccli. 17.*

SEPTIMUM
PRÆDESTINATIONIS
SIGNVM.

SYMBOLVM VII.

FRUTEX TABACI. Saluberrimum hoc fruticis genus est, ulceribus præsertim & vulneribus curandis illustre. grande ulcus corporis est, paupertas: grandius animi, peccatum. utrique persanando mirifice conducit *Eleemosyna*, illa præsertim quæ datur benigno affectu in egenos. & hæc per Tabaci fruticem repræsentatur. Ab Apostolo id *Ad Colof. 3* discimus: Induite vos, inquit, viscera misericordiæ sicut electi Dei. non dantis manum duntaxat, sed & affectum requirit. Vere beatus qui intelligit super egenum & pauperem, in die mala liberabit eum Dominus. Divinæ scripturæ syllogismo id firmatur. Qui accipit mutuum, servus est fœnerantis. sed *Ad Colof. 3* distissimus Deus per pauperem accipit mutuum. facilis est jam conclusio. alteram syllogismi partem confirmans Salom. 18: Fœneratur, inquit, Domino (seu, quod *Prov. 18.* idem, Dominus accipit mutuum ab eo) qui miseretur pauperis. Augustini ore Christus sic stipem mendicat: Da mihi ex eo quod dedi tibi, de meo quæro: da & redde; habuisti me largitorem, fac

me debitorem, habeam te fœneratorem: temporalia mihi das, æterna tibi restituum, teipsum tibi reddam, quando te mihi reddidero. Gregor. Nazianz. Orat. de amore pauperum. Fac calamitoso sis Deus, Dei misericordiam imitando, nihil enim tam divinum homo habet, quam de aliis bene mereri: tibi derelictus est pauper, velut Deo. talis in

Iob. 29 terra Deus Iob fuit; Pater, inquit, eram pauperum, & causam quam nesciebam, diligentissime investigabam. Oculus fui

Tob. 4 cæco & pes claud. Tobias Deo charissimus: Eleemosyna, inquit, ab omni peccato & à morte liberat, & non patitur animam ire in tenebras. Fiducia magna erit coram summo Deo eleemosyna, omnibus facientibus eam.

Herm. 33. & hom. 36. ad pop. I. Chrysostomus: Melius est, inquit, hanc artem dandi eleemosynam scire, quam esse regem. hæc enim domos ædificat in cælis semper mansuras, hæc docet quomodo Deo possis similis fieri. Magna res est homo, & pretiosa, vir misericors. Qui pronus est ad misericordiam, benedicetur, de panibus enim

Prov. 22. suis dedit pauperi. Ergo beneficentia, ut

Chrys. hom. 6. in c. 3. epist. ad Tit. eodem ore aureo loquar, Deo similes facit. & hæc charitatis mater, Christianæ virtutis propriū insigne, per quod discipuli Christi noscuntur: hæc nostrorum scelerum est medicina, hæc animæ sordes

emun.

emundat, hæc scala quæ in cœlum usque porrigitur. Christus præcipit: Thesaurizate vobis thesauros in cœlo. Audite, *Matt.* 6.
 ô divites, novam è cœlo artem : novus colligendi thesauri modus est, SPARGERE. Errastis hæctenus ; nam dando ditescimus , non corradendo & servando. Thesauros in orbe illo supero struit, qui pauperibus eos in hoc infero distribuit. imo nec opus quidem, plenas auro manus in egenos excutere ; date obolos & asses, date panis frustilla (modo benevolus affectus accedat) & in fœnus recipietis plenissima horrea , opulentissimum ærarium. Censores olim lustrabant civium ædes, & num si quæ tineæ in vestibus, vermes in carnibus, mures in panibus reperirentur, indagabant. non cassus hic labor, hodieque forsan invenirentur qui mallent hoc genus animalium pascere, quam pauperes. Sed jam inventus est locus, patetque cunctis ad eum aditus, ubi nulli mures, non tineæ, nulli vermes. Thesaurizate vobis thesauros in cœlo , ubi *Matt.* 6.
 neque ærugo neque tinea demolitur, & ubi fures non effodiunt nec furantur. Manna non corrumpebatur nisi quod in diem alterum servabatur ; numi non amittuntur, nisi quos amittere volumus : tutius servari non potest, quam quod perit inter manus mendiculorum. Ventres pauperum ampla sunt horrea,

quicquid hîc reconditur, incendii securum augetur, multiplicata usura. Si Absalomus auream cæsariem suam attondifset, crines capite, non funes gessisset: si fortunatiores rem suam in pauperum subsidium acciderent, tot amicos arca clauderent, quot numos; nihil dando hoc agunt, ut periculosiores sint insidiæ, quo plures pecuniæ. Perde pecuniam propter fratrem & amicum tuum, & non abscondas illam sub lapide in perditionem, suadet Ecclesiasticus.

Ecl.
29.

Luc. 6. Christus: Date & dabitur vobis. Puteus, si sua non amittat, lutescit: uberior fluit, & purior, sæpe hauriendo. Cælo destinati cum stipem dant, si possent, cor adderent, adeo benigno sensu in egenos feruntur, idcirco beatos pronuntiavit Christus misericordes, non eos solum qui possent quam plurimum elargiri, sed qui vellent omnium misereri. Pythagoras olim docuit, similia non nisi à similibus comprehendere; hoc vitæ mercatu, non nisi simile simili paratur, oleum emitur oleo. misericordiam vis consequi? hamum jace, misericordiæ opus. At dando aliis, egebo ipse? Pusilli animi homo, & qui mavis diffidentiae tuæ credere, quam syngraphæ Christi! quantos avaritia ad incitas redegit? nullos eleemosyna. certat Deus cum liberalitate nostra, nec munificen-

Luc. 6, tia finit se vinci: Date & dabitur vobis. Sa-

Sarephthana vidua non tantos fecit sum- 3. Reg.
ptus, in siccum prandiolum Eliæ, quan- 17.
tos lucrata est. Elisei hospita plus re- 4. Reg.
cepit quam hospiti suo contulit. 4.

I I. At sunt, non è numero præde-
stinatorum, qui raro dant, nisi dent ma-
ligne. Maligne dant, qui quæ nause-
ant, quibus carere malunt, quæ vix aut
esui sunt, aut usui amplius, pauperibus
elargiuntur: si quid in domo verminosæ
carnis, si quid mucidi panis, si quid fu-
gentis vini, aut morientis aceti; si quid
putridi, si quid fœtidi quod vix cani
porrigas, mox ad pauperes abit, muni-
fica donatione. Heu Christiani, quam
sæpe blanda persuasione, nos fallimus!
hoc non est oleum, sed (quod Baruch *Baruc.*
exprobrat) olivarum ossa offerre. c. 6.
Deus ad Cain & munera ejus non re- *Gen.*
spexit, quia vilissima de terræ fructibus c. 4.
offerebat, qui poterat meliora. Parum *Hom.*
potes? sufficit multum voluisse. Mul- 32. in
tum potes? cave velis parum dare. Si *epist. ad*
re non potes, pauperem spe bona, & *Heb.*
miti alloquio juva; saltem animo mise-
rere. Spreti non sunt Israelitæ illi qui
similam, setas, aut caprarum pilos ob-
tulerunt; meliora deerant: sed si au-
rum habuissent, & ista obtulissent (ait
Chrysostomus) maledicti protinus fuif-
sent. Quidam non maligne dant, sed
oleum misericordiæ, sordibus luxuriæ
E 4 vitiant;

vitiant; tam faciles ad eleemosynam quam in libidinem proni. Anazarbæi Ciliciæ populi, opimam regionis olivitatem, virginum suarum castimoniam tribuunt, quæ solæ illic plantant oleas, & olivas legunt. Christianis certissimum sit, oleam hanc nostram & Veneris myrtum, inimicissimas esse arbores, nec in eodem plantario jungi posse. ingrata est Deo eleemosyna, quam fœda carnis voluptas comitatur, nec simul placere possunt, manus munifica, & libidinosus animus. Sunt alii, qui quidem hoc carnis luto non merguntur, sed quia videri amant & laudari, oleum suum sterilissimo labore effundunt. Et cur, mi Christiane, scit læva tua, quid dextera tua faciat? Iobus olivæ te comparat florem projicienti. Hæc enim arbor, inquit Gregorius, etsi large floreat, si tamen immoderata stringatur nebula, fructum omnem desperari jubet. ita, qui tunc maxime misericors est, cum spectatores habet, vel ut habeat, fructum operis perdit, ex nebula favoris. Hominis prædestinati eleemosyna, unicum observat oculum, sed omnia cernentem; nec laudem expectat, nisi à quo & præmium, ab uno solo Deo. Et quamvis aureas habeat alas eleemosyna, Chrysostomo docente, non tamen pavonis instar, admiratores sibi deligit in terra, cum muneratorem habeat in cælo,

Iob.

c. 15.

Greg. l.

82.

mor.

c. 26.

Hom.

32.

cælo, eo suis aureis alis subvolat, & Christo se sistit, quē in mendico agnoscit. Eleemosyna tam non cupit esse nota, ut si possit, etiam clam domino suo latere velit, nam homo vere misericors, non laborat ut à multis sciatur quantum dederit, modo sciat is unus, qui potest danti reddere. ideo D. Cyprianus hunc benevolum in egenos animum, securitatis nostræ salutare vocat præsidium, quo Deum debitorem constituimus, & Christum judicem demeremur.

III. Supremo fatalis judicii die, de misericordia rigidum examen erit, & quæstio. ii quibus cor immite, durum, immisericors fuit, terribile velut in tabella decretum legent: *Ite maledicti in Matt. ignem æternum. At ii quos jam ab æ. 25.* terno divina destinatio Angelorum societati adscripsit, fidentius loqui poterunt cum iudice; licebit illis dicere: Da, quia dedimus: da te, quia tua causa dedimus: miseri sumus aliorum, tu nostri miserere: fecimus quod iussisti, redde quod promissisti. non erubescet hæc postulata iudex, & debitorem se libenter fatebitur. Cernent electi patulum in Christi latere hiansque & roseum vulnus, inque eo velut gemmis scriptum: *Venite benedicti, possidete regnum.* impetrastis quicquid petitis.

E 5 agnosco

agnosco promissionem meam, laudo misericordiam vestram, quæ jure sistere se præmio potest; accipite præmium quod pretio æstimari non potest. quicquid ulli meorum fecistis, mihi factum est. Vestra me commiseratio cibo potuque sæpius refecit: vestris ego vestibus tegebar, ad vestras ego ædes peregrinus divertebam; vester in me amor, ipsos ad me carceres penetravit; vestra misericordia vixi: *Venite benedicti*. fragmentum panis famelico dedistis? En, mensam paratissimam, venite æternum epulaturi. peregrinos tecto non exclusistis? Angelorum cives vos esse jubeo. seminudorum argentibus membris lanam injecistis? adeste, immortalitatis purpura velandi: *Venite benedicti*. O quæ hæc rerum commutatio pro centonibus, pro obolis, pro mensarum miculis, paludamentum gloriæ, thesauros cœli, delicias non finendas recipere! Omnis misericordia faciet locum unicuique secundum meritum operum suorum, & secundum intellectum peregrinationis ipsius. Hæc, si quam vera, tam essent omnibus persuasa, nemo foret, qui non tam vili vellet cœlum emere. Verissime dixit Augustinus: Si vis mercator esse optimus, da quod non potes retinere, ut recipias quod non poteris amittere; da modicum ut recipias centuplum, da pauperi numum,

ut

Eccl.

16.

*Cas.**Arela.**hom.*

13.

ut à Christo impetres regnum, da buccellam ut obtineas peccatorum veniam, da vestem ut merearis gloriæ stolam, da vilia ut consequaris æterna. Quæ autem stultitia, inquit Chrysostomus, illic tua relinquere unde exiturus es, & illuc non præmittere, quo iturus es? Illic ergo tua repone ubi tuam habes patriam.

*In
Matt.
6.*



SYMBOLVM .VIII.

Vilis sui æstimatio.



*Nisi efficiamini sicut parvuli,
non intrabitis in regnum
cælorum. Matth. 18 .*

PRÆDESTINATIONIS
SIGNVM.

SYMBOLVM VIII.

CVPRESSVS. Hæc perpetui viroris
& jucundi odoris arbor putredinem in se non admittit, ab aliis etiam, cadarofum fœtorem prohibet; hac non immerito *Vilis sui æstimatio* significatur, quæ latentem superbix vermiculum interficit, nec hominem ita corrumpi finit & putrescere, ut sibi placeat. mala certe sanies, placere sibi ipsi. Odi superbos & arceo. clamat David: Non habitabit in medio domus meæ *Psal. 110.* qui facit superbiam. Rarum ajunt esse generosum pharmacum, cui non insit veneni aliquid aut sacchari: nullum certe vitium est, in quo non aliquid superbix. percense omnia, & sic esse deprehendes. Initium omnis peccati est *Eccles. 10.* superbia, & qui tenuerit eam, replebitur maledictione, & subvertet eum in finem. Superbia pessimi ingenii fomes, funestis ac multiplicibus vitiis in diversa prorumpit, odii, amorisque & super omnia invidiæ suppliciis obnoxia. Nec alii magis anxii aut perpetui motus sunt, quam hominum non tam quærentium laudem, quam hanc sibi deberi cre-

credentium. Et contemni se facile suspicantur, & hanc aliorum, ut putant, contumaciam, in se acerbissimis curis vindicant. Iam sua vitia nesciunt, jam virtutes aliorum. Sic inflatis & turgentibus, pietas, fides & quicquid in hominibus sacrum, infra famam honorumque cupiditatem jacet. Et ceterorum quidem vitiorum materies sæpe vilissima, plerumque nobilissima est superbiæ, quæ quodvis præclarum facinus, eruditionem omnigenam & virtutem, omnem sanctitatē audet arroderere, prorsus ad instar vermium, qui non nisi optima pyra aut poma perrodunt, non est qui Diaboli mores venustius exprimat superbo. ille Altissimo par esse nitebatur, iste non exequari vult aliis, sed præferri. Sed nusquam non resistit superbis Deus, uti miles stans in pinnis mœnium, quotquot ascendunt, romphæa deturbat: quandoque tamen etiam vinulla superbus à Deo sternitur, perinde ac si regius olitor excrecentes in altum herbulas ludentibus digitis attondeat. Saul humilis in regem evectus, sublimis dejectus est. Sunt qui natura ceapas, sunt qui araneas aut feles horreant nativo odio: hæc natura Dei est, superbos horrere & execrari: Abominatio Domini est omnis arrogans: Immundus est apud Deum omnis qui exaltat cor suum. Sed veluti pestifera lues,

Iac. 4.

*Prov.
c. 16.*

*Prov.
c. 10.*

lues, varia corporis parte se prodit, sic
 superbia non una moratur sede: quo-
 rundam occupat oculos, aliorum lin-
 guam: horum manus invadit, plurimo-
 rum veste se involvit: sunt quorum col-
 lari tam pacata sedet & immobilis, ut
 illam nec centum concionatores loco
 moveant. Sunt quos sui negligentes, &
 juratos superbiæ hostes diceres, nisi suas
 epulas, ædificia sua, liberos suos atque
 familiam, ipsam supellectilem suam su-
 per bire docerent, arcano magisterio. Sic
 varie superbiam spiramus, subtili prorsus
 ventulo; quandoque ipse nos dejicimus
 infra quamlibet vilitatem, rosas &
 mulsæ loquimur, aulæ byssina verba ja-
 ctamus, omnium genibus advolvimur,
 ut male super alios efferamur: in alto
 jam positi, nec superiorem ferimus, nec
 parem. Quid superbis pulvis & cinis?
 levi te mors afflata disperget. quid tibi
 places Suffene? foetes hominibus, foetes
 Angelis, foetes Altissimo. terram spiras
 (ô lutum prisca Adami!) & Luciferi
 foetorem spargis. Si tibi non odor tan-
 tum cupressi, sed & altitudo placeat;
 age, ascende, sed præter te solum, ne-
 minem despice. hoc grande & præcla-
 rum est, in alto non altum sapere; cum
 extolleris, te ipsum deprimere, & (quod
 prædestinatorum est proprium) meritis
 cælum attingere, & opinione sua circa
 solum repere. Bernardus: Semper, in-
 quit,

Hom. 4 quit, divinæ gratiæ familiaris esse solet
super, humilitas, quæ est hæc tam sublimis
Missus humilitas, quæ cedere non novit hono-
est. ribus, inolescere gloria nescit? non est
 magnum in abjectione esse humilem,
 magna & rara virtus est, *humilitas hono-*
rata. Auditis hæc reges, & principes,
 rerum Domini? Auditisne ista vos viri
 tam docti quam superbi, vos tam fastuo-
 si quam numosi? rara virtus est, *humili-*
tas honorata. Veræ autem humilitatis
 hoc est proprium, ut quo quis, cœlo
 teste, sanctior, eo se iudice vilior cen-
Gen. featur. Abraham Deo commendatissi-
18. mus, nonne sibi *cinis & pulvis*: Petrus
Luc. 5. Ecclesiæ petra, nonne se palam & ex
 animo professus *hominem peccatorem*?
1. Cor. Paulus, vas electionis & Apostolorum
1. princeps, nonne sibi *abortivum*, & *in-*
dignus vocari Apostolus? Vere aliud exal-
 tationis principium non est, quam hu-
 militas, & vilissima sui æstimatio.

I. Superbia virtutum omnium ruina,
 & altissimam hominum & angelorum
 præcipitium. qualis, ô Deus, inter cœ-
 lum & terram facta est olim commuta-
 tio! pulcherrimus omnium angelus cœ-
 lo præcipitatur, & miserrimus omnium
 mendiculus, in cœlum ab angelis de-
 portatur. nam unde Lucifer superbus
 cecidit, eo ulcerosus Lazarus ascendit,
 quem credibile est sæpius sua ulcera
 nume-

numeraſſe, quam ſuas virtutes, nec dubium quin cunctis patientior ſit viſus quam ſibi, genuino ſui contemptu. non illepide & vere dixit Sanctorum quiſpiam : Parum valet, qui ſe aliquid valere cenſet ; nil penitus valet, qui ſe multum valere autumat. huic aſſentitur Bernardus, &, Omnia, inquit, illi deſunt, qui nihil ſibi deeſſe putat. addi poteſt : cœlo natos non videri, quibus ſua tantum placent, qui alienæ vitæ ſuperbiſſimi cenſores, ſuæ vaniſſimi æſtimatores, tam falluntur circa aliena, quam in propriis cæcutiunt, jucunda lippitudine. Abite, ô vani, cœlum ejuscemodi pavones non admittit : cœlo prædeſtinati, nullius vitam ita rigide cenſent ac ſuam, nullius mores toties damnant quam ſuos ; facile indulgent omnibus, nunquam ſibi ; in neminem ſeveriores quam in ſeipſos. miſeri nos ! pulvis ſumus & umbra, brevi ad plures abituri, & tamen origines noſtras, & Majorum imagines longa oſtentatione percenſemus, tanquam ſi magis homines ſint, qui plures avos numerant. Homo vanitati ſimilis factus eſt, dies *Pſal.* ejus ſicut umbra prætereunt. quoquo *143.* vertamus oculos, lacrimas noſtras cernimus. cœlum tuemur ? patriam quidem eminus videmus, ſed in exilio nos eſſe ſentimus. terram deſpicimus ? foveam illa nobis minatur, & licet eam

pedibus calcemus, caput tamen nostrum
 sibi ea pollicetur, paulo post pro libitu
 tractandum. Nos ipsos aspiciamus? ô
 pulchrum & rubicundulum pomum!
 sed vermiculus latet. putredo, sanies,
 mors penitis visceribus delitescunt. cor
 ipsum inspicimus? ô profundam spe-
 cum, & fœdam! quantum hîc anguim
 & colubrorum agmen? heu, vitiis sca-
 temus, nobis tamen necdum vilesci-
 mus. miseriis, stultitia, peccatis obruti
 jacemus, & tamen beati, sapientes,
 docti videri volumus, ac digito mon-
 strari. Prædestinatos universa hæc ad
 maximam suâ vilitatem compellunt, ita
 ut quo magis se suaque considerant,
 tanto magis in dies sibi ipsis sordescunt.
 & his ex facili, uti beato Paulo, sordent
 omnia, qui sibi prius ipsis sordere inci-
 piunt, nec difficulter omnia contem-
 nunt, qui ante omnia seipsos. quisquis
 beatus esse vult, discat contemni, &
 præter Deum, contemnere universa.
 Norunt prædestinati quam vere sit di-
 ctum à Chrysofomo: Minimum de se
 sensisse tam magnum est, quam res
 maximas fecisse. Norunt clamantis vo-
 cem: Qui vestrum major esse voluerit,
 in regno cœlorum (si tamen eo perve-
 niat) minor est futurus. Viam humili-
 tatis norunt esse confragosam, & ini-
 tio nonnihil difficilem, sed planiorem
 paullatim & commodiorem; colliculum
 sibi

Hom.

3. in

Matth.

Hieronymus merito deplorat: Multi hu- *Hi, 7.*
 militatis umbram, veritatem pauci se- *epist.*
 ctantur: pauci, sed hi beati & cœlo præ- *27.*
 destinati, qui quo magis seipsos vident,
 tanto magis sibiipfis displicent, tanto
 pretiosiores Deo, quanto sibi viliores;
 qui minus se vident, minus sibi displicent.
 Multi sciunt multa, seipsos nesci- *S. Gre.*
 unt, tanto minores in Dei oculis, quan- *1. 35.*
 to majores in suis. Magnus & tutus ad *mor.*
 Deum adscensus est, propriæ vilitatis *6. 5.*
 agnitio. Et verissime dixit Cassiodorus:
 Descendendo, cœlum ascenditur. *In Ps. 6*



F 3a 1 NO

SYMBOLVM.IX.

Dilectio inimicorum.



*Noli vinci a malo, sed vince
in bono malum. ad Rom. 12.*

NONVM

PRÆDESTINATIONIS

SIGNVM.

SYMBOLVM IX.

HASTIS PER OLEAGI-
 NVNVM SERTVM CONIVN-
 CTIS repræsentatur *Dilectio ini-*
micorum. Olivæ ramus, priscis notissi-
 mum pacis signum fuerat. Plexilis hîc
 oliva hastas hostiliter concurrentes con-
 ciliat, & in amplexum cogit, uti amor
 inimicos. Serium Christi præceptum
 est: Ego autem dico vobis, diligite ini-
 micos vestros, benefacite his qui ode-
 runt vos, & orate pro persequentibus
 & calumniantibus, vos, ut sitis filii
 patris vestri qui in cœlis est. Opus
 hoc, inquis, arduum est & difficile. Sed
 quo difficilior, hoc Deo gratius & no-
 bis utilius. Multa sunt genera elee-
 mosynarum, quæ cum facimus, adjuva-
 mur ut nobis dimittantur peccata, sed
 ea nihil est majus, quam cum ex corde
 dimittimus peccata iis qui offenderunt
 nos. Christus jam in alto pendens,
 linguam solam à flagris & clavis habuit
 immunem, & hanc in ipsa cruce primo
 omnium solvit, in patrocinium eorum
 qui se manu aut lingua crucifixerunt.

Matth.
 5.

Aug.
in En-
chir.

Disertus & potens suis met hostibus ad-
 vocatus. Et discipulos in hoc habui-
 hic in cruce Magister, sed paucissimos
 Stephano pro inimicis oranti cœlum
 panditur, velut si ad nobile hoc specta-
 culum cœlites omnes sint intenti. Idem
 sanctissimus protomartyr pro se, stans
 pro inimicis utroque genu flexo preca-
 tur, & simul patefactum intuetur cœ-
 lum, stantemque Iesum à dextris virtu-
 tis Dei. Si liceat quærere : Domine
 quid hoc agis? priusne, præmium &
 triumphus, quam prælium? nondum
 os Stephani aperitur, & jam cœli ja-
 nuæ referantur? nondum vivere desit
 hic Levita, & te jam videt? nunquid
 nemini bene meritorum te finis esse a-
 spectabilem, nisi in supremo tui domi-
 ciliî recessu? quid ergo est quod Ste-
 phano exeat obviam beatitudo, & ex-
 tra cœli januas procuret? nondum ex
 arena hic miles abiit, adhuc in pulvere
 luctatur, etiamnum orat, & quidem
 pro suis hostibus. O felix & potens
 oratio! Sed perpendamus causam sic
 accelerantis præmii. Tam grata Deo
 est injuriarum remissio, & seria depre-
 catio pro inimicis, ut mitissimus Deus
 omnem hîc majestatem ponat, amplif-
 simam legis gratiam faciat, nec ad regi-
 um solium primum coronare athletam
 velit, sed præveniat, jubeatque pulcher-
 rimam beatitudinem ad ipsas palatii val-

vas, imo extra domus limina prodire,
 ut felicissimus hic pugil, qui hostes in-
 fenfissimos ac ipsos interfectores suos
 amavit, proque eis & lacrimans & mo-
 riens supplicavit, præter legem honori-
 ficientissime ad triumphos evocetur. &
 hoc est æterni regis privilegium, iis qui
 injuriarum volunt esse immemores,
 concessum. adeo non male pati, sed
 male facere, est malum perpeti. Mi-
 tissimus David, qui cum ursis & leoni-
 bus pugnabat, & vincebat; ille sic stre-
 nuus & nullo timore perterritus, cum
 hostem capitalissimum Saulem sub ha-
 stæ cuspide non semel teneret, parcere
 tamen maluit quam occidere, illudque
 veluti armorum suorum insigne canta-
 bat: Si reddidi retribuendis mihi ma- *Pf. 7.*
 la, decidam merito ab inimicis meis
 inanis. Fortissimus Paulus qui arma-
 torum cuneos, qui mortem, qui infe-
 ros ipsos in certamen vocabat, in inimi-
 cos adeo clemens erat & beni-
 gnus, ut diceret: Maledici- *I. Cor.*
 mur & benedicimus: per- *4.*
 secutionem patimur &
 sustinemus: bla-
 sphemamur &
 obsecra-
 mus.

I. Nobilissimum & generosissimum vindictæ genus est, ignoscere cum possis ulcisci: & longe gloriosius est tacendo vincere inimicum, quam respondendo: Honor est homini qui se separat à contentionibus. Ambrosius.

Prov. 20. Vindicare se, inquit, non est actus fortitudinis, sed abjectionis, & timiditatis.

Lib. 1. Offic. c. 36. Vincitur ab inimico, non vincit, qui se vindicat. nec aliter sentit philosophorū princeps: Sicut debilis est stomachi, ait, cibum duriores non posse concoquere, ita hominis pusillanimis est; verbum duriusculum non posse sustinere. Nemo luculentius probat se Christianum esse, quam qui amat inimicum. virtuti exercendæ aut sincerissimo amico est opus, aut asperrimo inimico, cui nemo unquam sic nocuit, ut non magis sibi ipsi. Chrysostomus: Vindicta, inquit, in corde posita, nocentior est vipera. neque enim minus malum est, referre injuriam quam inferre. inimicum feris? te ipsum letaliter jam læsisti. & hoc est prunas è foco rapere, sed omnium primo sibi manus amburere, dein alios iis perfundere. sic semper prima pars malorum in auctorem suum vertitur, interdum etiam novissima, cum sæpe interim sit illæsus, in quem perniciēs parabatur. quisquis alium odit, primum animæ suæ vulnus infligit. Qui non diligit, manet in morte.

Hom. 41. in *Act.* *Apost.* *Laſtā. de ira Dei.* 1. Io. 3

At

At durum est, quicquid dicant alii, durum est, inimicum amare: Sed erit longe durius inter innumeros inimicos apud inferos ardere. Difficile eum diligere quem vix odio dignum censeas: sed difficilius erit audire ab iride clamantem: *Abite maledicti in ignem aeternum.* Nimis arduum est, illæsum eum finire qui toties læsit: Montem non scandet, qui vitat ardua: cœlum fugit, quisquis inimicum odit. Peregrinabundi huc illuc sæpe currimus, subinde deteriores redimus; templorum aras cera cumulamus, nos interim saxea pectora gerimus; impetrando Iubilæo satagimus, nec tamen vindictam urgere definimus. ô mi Christiane, Iubilæum Deus in ædium tuarum vestibulo tibi statuit, tuum facis vel verbulo. dic: *Ignosco*, & noxarum omnium veniam impetraſti: Dimitte & dimittetur tibi, *Luc. 6.* nam si tradideris corpus tuum ita ut *1. Cor.* ardeas, charitatem autem non habueris, *13.* etiam erga inimicos, nihil tibi prodest. Dives cenſetur, qui multos numerat debitores: inimici in te injuriæ multa tibi debent, ideo ab illis ditesces si velis. Subduc modo ratiunculam, quantum tibi fit æris tui, quantumque alieni: dives es si non reddis iis quibus debes. quot nomina apud Deum contraxisti? & jam negligentia tua factus es non solvendo. quin tu ergo Deum

Ecd.
6.28.

Deum ad debitores tuos remittis, & tua nomina, quæ nunquam posses, per illos expungis? Dimitte & dimittetur tibi. Relinque proximo tuo nocenti te, & tunc deprecanti tibi peccata solventur. Ingentia tibi debita condonat Deus, si tu aliis parva. notum illud Hieronymi: O formidolosa sententia! Si parva fratribus non dimittimus, magna nobis à Deo non dimittuntur. Veniam quam quis habet inimico, hanc à Deo speret.

Rom.
12.
Prov.
25.

In c.
12. ad
Rom.

II. Ergo saltem tui miserere, & homo, & ne teipsum oderis, ama inimicum. Utionis non longa est delectatio, misericordiæ sempiterna. Noli, obsecro, vinci à malo, sed vince in bono malum. Si esurierit inimicus tuus, ciba illum; si sitierit, da ei aquam bibere, prunas enim congregabis super caput ejus, & Dominus reddet tibi. vince in bono malum. De hac victoria Chrysostomus: In Olympicis, ait, certaminibus Diabolo consecratis lex est, malefaciendo vincere: in stadio Christi, omnino lex est contraria; hic enim non eum qui percutit, sed qui percutitur, coronari decretum est. Si mansuetudinem exhiberemus, effemus omnibus insuperabiles, nec ulla ad nos injuria perveniret. Ergo, ne dicas: reddam malum.

expe-

expecta Dominum & liberabit te. nec *Prov.*
 dicas, quomodo fecit mihi, sic faci- *20. &*
 am ei. Et cur damno tuo nocere cupis *Prov.*
 alteri? O canis quid lapidem mor- *24.*
 des? cum manu age quæ misit lapi-
 dem. ô bubo, ô cæce, quid furis in
 adversarium? dimitte eum ut maledi-
 cat: Dominus enim præcepit ei ut *2. Reg.*
 malediceret tibi. Ad mortem damna- *16.*
 tus carnifici non indignatur, sed judi-
 ci. & cur, miselle homo, carnificem
 tu tuum invadis? judicem attende.
 Deus est, qui talem in te antagonistam
 immisit, sed bono tuo, plectendis de-
 lictis tuis. Iobo Diabolus nec unam *Iob.*
 quidem oviculam ademisset, nisi Deus *c. 1.*
 id permisisset. Dominus dedit, & Do-
 minus etiam abstulit, non Diabolus.
 Non haberes potestatem adversum me *Ioan.*
 ullam, nisi tibi datum esset desuper, *c. 19.*
 respondit Pontio Christus. idem pror-
 sus inimico tu tuo responde. Plurimis
 plus inimici profuere quam amicissimi.
 tyrannos tolle, non erant martyres:
 non sint inimici, tollentur plurimo-
 rum præmia. non minus Diocletianus
 Ecclesiam ampliavit immanitate &
 gladio, quam Constantinus liberalita-
 te & auro. Evangelicus ille paterfa-
 milias, voluit frumentum & lolium
 una surgere: Sinite, inquit, utraque *Math.*
 crescere, sed usque ad messem. At *13.*
 nos præproperi & in perniciem no-
 stram

stram festinantis ingenii homines, ut primum noxiam herbulam conspiciamur, mox clamamus: Carduos ad ignem, ad flammam lolium, inimicos ad Orcum. Lentius, ô boni, lentius, non sic licet ante messem in agros grafari. tempore messis dicetur messoribus: Colligite primum zizania, & alligate ea in fasciculos ad comburendum. Cur ergo vota nostra damnamus ipsi, tam male festinato imperu, quid inimicos ad pœnas raptamus? hoc genus lolii, falcem & ignem non evadet, sed nondum est messis. Christus cum suos orare, ac septemplex petitionem divino patri offerre docuisset, è septenis his petitionibus non sine causa solam illam de condonandis injuriarum debitis repetiit, explicavit, & quid explicatione hac aliud declaravit, quam, quædam monstranda esse, quædam etiam inculcanda. nec enim unquam nimis dicitur, quod nunquam satis discitur. Et vel inde divinam legem dilaudans David: Latum, inquit, mandatum tuum nimis. vere latissimum, quod notos ignotosque, tam benefactores quam hostes, dignos & indignos, inimicos perinde atque amicos amari præcipit. Nemo torque aurea collo affusa, tam certo se vel divitem, vel doctum, aut nobilem probat, quam certo quis Dei se

Matth.
6.

Psal.
118.

Chrys.
hom. 2.
in epist.
ad Ph.

se filium esse demonstrat, qui inimicos amat. Sed quis ita semper apud se est, cum iræ fluctus insurgunt, qui non pessimis execrationibus inimicum liberali ore devoveat? At Christiani est, imperare iræ & motos ejuscemodi fluctus componere. Pulchre Augustinus: *Serm. 3. inter 17. hom.* Audisti, ait, convitium? ventus est. Iratus es? fluctus est. vento igitur flante, fluctu surgente periclitatur navis, periclitatur cor tuum. audito convitio vindicari vis, & ecce vindicando te, fecisti naufragium, & quare hoc? quia dormit in te Christus, oblitus es Christum. nimirum excidit tibi, Christum, cum crucifigeretur, inimicis suis non crucem, sed veniam à patre lacrimis exorasse. En ergo Christus in te dormit, qui pro suis hostibus, non vigilare tantum, sed & mori te docuit. Excita ergo in te Christum, & dic tibi ipse: Et qui sum ego ut ulcisci me velim? forsan prius ego mortem, quam inimicus ultionem meam sentiet. hinc vero migrantem animam repellat à se Christus, qui mansuetudinem docuit non furorem; submissionis præceptor, non ultionis; charitatis atque veniæ magister, non odiorum & vindictæ.

III. Sed sine oculis , sine auribus
est ultio, surda & cæca fertur , quo eam
rapit impetus , ut jure priscus poëta
indignetur:

Plant. --- *Verum ita sunt isti nostri divites*
in *Si quid bene facias , levior pluma est*
Pæn. *gratia:*
Act. 3. *Si quid peccatum est , plumbeas iras ge-*
scen. *runt.*
ult.

Nempe plumbeo plerique sunt obtuso-
que & jacente animo , qui rebus om-
nibus , præterquam injuriis indormi-
unt. qualibet offensionis aura , grati-
am avolare jubent & evanescere , con-
tumeliam grandi odio , velut appenso
plumbo in pectus altissime demittunt.
Date veniam , Christiani , ab ipsis ido-
latriis superamur : eorum & testimo-
nia & exempla nos lapidant , ut supre-
mo mundi die , nulla nobis futura sit
excusatio. Sane Pompejo Magno non
magis laudi datum lego , quod tribus
amplissimis triumphis tres orbis terra-
rum partes complexus sit, quam quod
lib. 2. esset , ut Paterculus scribit , amicitia-
hist. rum tenax , in offensis exorabilis , in
accipienda satisfactione facillimus. Au-
gustus Imperator Cinnam necem sibi
machinantem vita donans : O Cinna,
inquit , iterum tibi vitam do , prius
hosti , nunc insidiatori ac parricidæ,
eique consulatum obtulit. Vis exitum ?
Cinnam habuit perpetuo amicissimum,
&

& solus illi hæres fuit. Phocion innocentissimus , & Imperator , jam capite damnatus , cum lictor ei venenatum calicem porrexisset , rogatus à cognatis , quidnam ad filium manderet ? Mando , inquit , ut obliviscatur hujus poculi , quod ab Atheniensibus propinatum nunc epoto. Iulius Cæsar nihil unquam præter injurias oblitus dicitur. At quis nostrum hîc videri aut esse vult obliviosus ? quam firma plerique omnes memoria sumus , cum injuriarum res agitur ? Beneficia pulveri , filici vero injurias inscribimus , manet alta mente repositum. Nemo cedit , nec Deo quidem imperante. Iam olim Deus vindictam omnem prohibuit , & severe prorsus edixit : *Mea Deus. est ultio , & ego retribuam in tempore.* 32. Nihilominus quotusquisque est , qui non impie reclamet ? *Mea , Domine , est ultio , & ego retribuam.* Opponit iterum Deus : *Mihi vindictam : ego retribuam.* Rom. Obluctatur iterum homo : *Mi-* 12. *hi vindictam , Domine , ego retribuam : tu nimis es exorari facilis , sera nimis tua est ultio.* Sic improbissimo & plusquam temerario ausu , Dei munus invadimus ; gladium in inimicos nostros ab ipso stringendum flagitiose præripimus ; pars læsa cum simus , judicis severitatem induimus.

Rufin. IIII. Narrat Rufinus Aquilejensis
l. 3. n. (& complures alii Græcorum interpre-
77. tes) & : Ad Sisoium , inquit , reli-
Pasch. giosissimum senem , injuriam quidam
c. 10. passus se contulit ; & contumeliæ ge-
n. 2. nus , ore , ut fit , tragico exponens
Pela- Obsecro, inquit , permitte mihi Pater
gius li- ut homo sim , & me vindicem. At se-
bell. nex multis apud eum precibus institit
16. ne sic homo esse vellet , ut diabolus fie-
n. 10. ret. Nimirum Deo id curæ futurum
Pallud. Deo viadictam omnem permetteret ; sat
in ap- fortem esse hunc ultorem ; injuriarum
pend. reum divinas manus non evasurum.
lausiac. At ille : Mihi certum est , inquit ,
hist. hoc ei non condonare , nec desistam
 dum par pari reddidero. Cui senex :
 Quæso te inquit , homo sis , sed Chri-
 stianus , & quid ratio dicter , non
 quid imperus velit , attende. Et vero ra-
 tio , inquit iste , hoc suadet , ut ei non
 parcatur , qui nec ipse pepercit aliis.
 Contra Sisoius : Sed hoc tuum non
 est , inquit , aut velle , aut facere.
 Ius gladii in hac causa penes solum
Ps. 93. Deum est. Deus ultionum Dominus,
 Deus ultionum libere egit : nobis hæc
 agendi libertas negata est. Et nosti,
 credo , quid Christus non consilii sed
 præcepti dederit : inimicis non tan-
 tum veniam , sed & preces , amorem ,
 beneficia deberi. Pater , inquit iste , a-
 nimus meus commotum mare est , nec
 quie-

quieturum dum me vindicare. Quandoquidem ergo, inquit Sisoïus, obfirmasti animum, saltem non præcipitata; obsecro prius oremus. Ambo simul submiserunt genua, & vocem præiit fenex, in hæc verba: Deus, tuum nobis auxilium jam non est necessarium, nec ut pro nobis sollicitus sis, rogamus: nos ipsi omnia curabimus; nostra est ultio, & nos retribuemus, jamque in eo sumus ut inimicos nostros *Psal.* ponamus scabellum pedum nostrorum. 109.
 Adeo perculerunt hominis animū hæc verba, ut mox toto corpore ad senis genua provolutus, humentibus oculis promiserit, illatam injuriam nec verbulo à se vindicandam. Hoc Iusti justorum præceptum est; hæc germana filiorum Dei nota, non gravate dare veniam offendenti, insuper etiam offensam beneficio redimere. Vide-1. *The.*
 te, inquit Paulus, ne quis malum pro 5. malo, alicui reddat, sed semper quod bonum est sectamini invicem & in omnes, nulli malum pro malo reddent. *Rom.*
 tes. Hæc Paulus; sed hæc Christus 12.
 apertius etiam longeque severius injungit: Vobis, inquit, dico qui au- *Luc. 6.*
 ditis, diligite inimicos vestros, benefacite his qui oderunt vos: benedicite maledicentibus vobis. Et prout vultis, ut faciant vobis homines, & vos facite illis similiter. Et si diligitis qui

vos diligunt, quæ vobis est gratia nam & peccatores diligentes se diligunt. Et si benefeceritis his qui vobis benefaciunt, quæ vobis est gratia? si quidem & peccatores hoc faciunt: Veruntamen diligite inimicos vestros, & erit merces vestra multa, & eritis filii Altissimi, quia ipse benignus est super ingratos & malos. Hæc quidem iuste imperas, & liberaliter promittis, sed, ô bone Domine, quam multi sunt qui te non audiunt, nec lex tua apud illos tanti est, ut finem ponant odiis; fatentur nolle se in istam ignoscendi facilitatem effeminari; nil sibi fore iucundius quam præsentis & paræ monete factam injuriam persolvere: atque si

3. *Reg.* optio illis, quæ Salomoni, fieret postulandi quod vellent, non sapientiam peterent, sed vindictam. Horum nemo non clamaret: Da mihi Domine inimicorum meorum animas; cetera relinquam tibi. Hic germanus vindictæ spiritus est, Dei legem non curare, Dei minas parvi ducere, injuriam non tantum non perferre sed reddere, totam bilem ad unum verbum evomere, furentis ex dolore animi impulsus sequi, votis omnibus inimicum perdere. Hæc ulciscendi libido, inquit Ter-

Lib. de patient. tullianus, negotium curat, aut gloriæ, aut malitiæ: sed gloria ubique

10.11 vana est, & malitia Domino odiosa, hoc

nec quidem loco maxime, quia malum duplicat quod semel factum est. Quid enim refert inter provocantem & provocatum, nisi quod ille prior in maleficio deprehenditur, iste posterior, uterque læsi Domini reus est. Dominus monet: Verberanti te in faciem, etiam alteram genam obverte. Fatigetur aliena improbitas patientia tua: plus improbum illum cædis sustinendo, ab eo enim vapulabit cujus gratia sustines. Et quem honorem litabimus Domino, si nobis arbitrium defensionis arrogaverimus? Sequester patientiæ est Deus, si injuriam deposueris penes eum, ultor est: si damnum, restitutor est: si dolorem, medicus est: si mortem, resuscitator est.

V. Sed objicias: Semper ego auditor tantum, nunquamne reponam, vexatus toties? Ita, mi Christiane, tu nunquam repones, etsi centies, etsi millies vexatus. Si vis esse Dei filius, tuo patri hanc causam committe: tu file & patere. Nocentes peribunt qui te vexaverunt, & qui gratulati sunt in tua ruina, punientur. Qui injuriam fecit, recipiet id quod inique gessit. Sed inquis: Injuriam condono, non oblittero; non obliviscor. Itane? hæc tua liberalitas est? nec tu aliam apud Deum quære. Homo homini, inquit

Baruc.

c. 4.

Coloss.

c. 3.

Eccles.

Matt.
18.

Ecclesiasticus, reservat iram, & à Deo quærit medelam? in hominem similem sibi non habet misericordiam, & de peccatis suis deprecatur? Ipse, dum caro sit, reservat iram, & propitiationem petit à Deo? quis exorabit pro delictis illius? Clementiæ vanissimus fucus est, nolle ulcisci, nec tamen oblivisci velle: si quid donas, ex integro dona, aut cœlum despera. Nosti, quid minetur Christus: Sic & pater meus cœlestis faciet vobis, si non remiseritis unusquisque fratri suo DE CORDIBVS VESTRIS. Sed dicas: Ego quidem non difficilis forem ignoscendo: at publicum mihi munus commissum est, impune nemo injuriam mihi fecerit, honorem meum eo defensum. Obsecro, Christiani, non argutemur in tam serio salutis negotio: auferte hæc picta vocularum ludibria. Munus publicum gerebat & Stephanus, nullum tamen lapidem in hostes regerebat; neque honorem suum ita defendebat, quin sincerissimo pectore clamaret: *Domine Iesu ne statuas illis hoc peccatum.* IESVS crucifixus, non qua hominis tantum, sed qua Dei filius, supplices lacrimas pro hostibus ad patrem mittebat: *Pater dimitte illis.* Tantæ majestatis non est ullus mortalium, ut turpe sibi putet, injurias præsertim proprias ex toto ignoscere. Non quæras ultio-

Levit.
cap. 19

ultionem, nec memor eris injuriæ civium tuorum. Sed nulla, inquis, offensionis causa illi nebuloni à me data est. Si causam dedisses, injuria non esset quam tolerares; parilis utrinque foret læsio. Quid de causa disputas? quid Ioseph fratribus nocuit, cum somnium suum narravit? & tamen injuriam omnem jam Ægypti prorex generoso silentio concoxit. Sed non est, inquis, levicula injuria quæ illata mihi est. Quid jam injuriæ gravitatem exaggeras? nec præmium erit eximium, si dimissa offensio sit levis. Virtute nunquam magnus eris, nisi magnis injuriis exercearis. Hieronymum audi: Deus faber *Hier.* est: inimici lima sunt & mallei, qui *in c. 5.* bus nos ille expurgat sanctosque scul- *Matt.* pit. Sed nunquid cum Paulo jam lapidatus, aut cum Christo flagellatus, & in Crucem sublatus es? Sed nobilis sum ego, vilis ille homuncio est, & terræ filius. O testa Samia! de eodem luto es, de quo tuus inimicus, aut paullulum meliore. Si vindictæ libido te vincit, non nobilium es filius, sed peccati servus. Ergo potius memento *Ecccl.* novissimorum & desine inimicari. Et si *c. 28.* nō vindicem, inquis, ut tamen vindicare me nolim, eam mihi vim facere non possum. Potes, modo velis, sed quandiu odiis alimentum in animo ministras, quicquid cogitas, merum est

absynthium : urticas , tribulos , sentes
geris in pectore , quibus cruenta con-
scientia miserrime uritur. Ardeo , in-
quis, vindicta. Nisi mature hunc ignem
fopias & extinguas , cœli januam tibi
jam obserasti , & magnis passibus ad
ignes stygios tendis , ubi æternum ar-
deas. Porta cœli injuriarum perpeffio
est , at qui vindicari vult , à Domino
inveniet vindictam , & peccata illius
servans servabit. At nulla, inquis, qui-
es mihi est , non somnus , non cibus,
aut potus sapiunt, dum Mardochæum
sedentem video & intactum , dum ini-
micum talia in me molientem cerno &
indemnem. Pulchre, mi homo , in ca-
put tuum deciperis. Narrat Ezechiel de
quibusdam militibus qui posuerunt gla-
dios suos sub capitibus suis, & descen-
derunt ad infernum cum armis suis. En
novum cervicalis genus , gladium ! tali
cervicali somnum suum fulciunt omnes
vindictæ cupidi , qui nullam sibi quie-
tem nisi à convitiis , à manu , à gladio
petunt. Sic primus diaboli discipulus
(ita Cainum vocat Basilius) in fratrem
jugulatrice manu ibat , ut extincta fra-
tris gloria suam sibi stabiliret. Contra-
rium evenit. Esau , Saul , Antiochus
divinam misericordiam non sine lacri-
mis implorarunt, non auditi. Esau non
invenit locum pœnitentiæ , quamvis
cum lacrimis inquisisset eam. Ita Saul,
ita

Eecl.
 28.

Cap.
 32.

Hebr.
 12.

ita & Antiochus , ab ara misericordiæ ,
 ad quam confugerant , rejecti , & ju-
 re : nec ipsi parcere volebant iis quos
 inimicos sibi statuerant. Iudicium sine *Ecccl.*
 misericordia fiet ei , qui non fecerit mi- 28.
 sericordiam. Rex David fædo lapsu
 peccatum duplicavit , & libidinem san-
 guine miscuit , quamprimum tamen
 pœnitentiæ signum edidit , & vix ge-
 minas voculas , *Peccavi Domino* , pro-
 nunciavit , mox à Nathane audiit : *Do-* 2. Reg.
minus peccatum tuum transtulit. 12.
 Quo-
 ties Antiochus peccasse se fassus , non
 sine grandi ejulatu clementiam Numi-
 nis imploravit , templo donaria vovit ,
 emendatissimos mores in reliquam vi-
 tam promisit. Sed repulsam tulit. Nec
 mirum : longe aliter Hebræus ille rex ,
 & aliter Assyrius tyrannus iste , in ad-
 versarios se gessit. David nullo regum
 inferior bellando & vincendo ; omni-
 bus tamen longe superior parcendo ,
 ut qui nihil minus sibi voluerit licere ,
 quam ulcisci , benignior vel in hostes
 suos , quam in suos cives Antiochus ,
 qui non nisi gladios , ignes , sangui-
 nem , ultionem , cædes spirabat.

V I. Ægrotos medici non deserunt ,
 donec videant prostratas vires ad tum-
 bam fatiscere. Est tamen morbi genus ,
 cujus primo intaitu medicus dicat : Se-
 pulchrum aperite ; hic homo moritur.

- Ita prorsus , licet nullius improbi hominis desperanda sit salus , dum exhalaret : in hoc tamen ægritudinis genere , cum putrida viscera felle natant , cum animus odiis & vindictæ cupidine laborat , aperte Ioannes Apostolus pronunciat : Sepulchrum aperite huic misero ; est peccatum ad mortem , non pro illo dico ut roget quis : raro respiscunt qui semel obstinarunt animum in vindictam. Non est sensus , ubi est amaritudo. Sed etsi clament omnes sapientes , minentur omnes prophetæ , hortentur omnes angeli , ut sepulta injuriarum memoria , in mutuos amplexus ruamus , adhuc tamen audacissime conciliationem omnem averfamur , adhuc talionem postulamus. Sapientium denique omnium sapientissimus homo , prophetarum doctor , rex angelorum , auctoritate maxima , potestate summa venit , non ut suadeat hanc unionem , sed ut præcipiat , non ut consilium offerat , sed ut legem figat , & adhuc impudentissime refragamur. Audite Christum regem præcipientem , audite reluctantes subditos : Stat Christus & patris nomine imperat : *Ego* *Matt.* *autem dico vobis , diligite inimicos vestros.* 5. Stant rebelles subditi & clamant : O *Luc.* 6. *Christe , frustra hæc dicis , frustra imperas. Vobis dico , vobis Christianis .* Nos ab Ethnicis in hoc stamus ; non audiris *Christe.*

Christe. *Diligite inimicos vestros. Vix ullus est qui obtemperet. Ego autem dico vobis, non resistere malo. Ignavi dicemur & imbelles. Orate pro persequentibus & calumniantibus vos. Rara est hæc oratio & nimis frigida. Ut sitis filii Patris vestri qui in cælis est. Nimis caro venalis est hic titulus. Benefacite his qui ederunt vos. Contra naturam, Domine, imperas; manda faciliora. Dimitte & dimittetur vobis. Non possumus, ut scias Christe, non possumus, hoc est nolumus iram cohibere, dentes restringere, manum continere; & quis cogitationibus imperet? Si dimiseritis hominibus peccata eorum, dimittet & vobis pater vester cælestis delicta vestra. Parati sumus perire, modo simul pereat inimicus.*

VII. O Christiani, adeone cælum odistis, ut sic velis remiisque ad inferos properetis? Vbi vestrum illud? Dimitte nobis debita nostra *sicut* & nos dimittimus? aut ergo inimici vobis vestri amandi sunt, aut toties vobis ipsi laqueum injicitis, quoties hoc à Deo postulatis: Scut nos aliis dimittimus, ita tu nobis, ô Deus, dimitte. Sed nos nihil condonamus, omnia vindicatum, omnia imus punitum, odio implacabili. Ergo & tu in nobis nil impunitum relinque. Impiorum est hoc ingenium non prædestinatorum, nam hi
tam

tam graviter lædi non possunt quin clament : Pater dimitte illis , Ne statuas illis hoc peccatum ; Ego omnia condono , omnia remitto , nihil ulturus. hæc voces prædestinatorum sunt. Sed priusquam finiam, obsecro vos omnes, qui hæc legitis , nec tamen inimicos diligitis , creditisne hæc vera esse ? vera , dicetis , nisi Veritas mentiri & Christus decipere potuerit. Si ergo vera sint ista, uti sunt verissima : quæ tandem impia hæc est contumacia, quæ hæc tam obstinata divinæ legis irrissio, quis iste tam protervus iubentis Dei contemptus ? Clamat Christus & præcipit: Ignoscite, dimittite, diligite non amicos tantum, sed & quoscunque inimicos. Adhuc vestra stat pervicacia, adhuc inimicos odistis? nondum ignoscitis, nondum malevolos obtrectatores amatis? nec tanti apud vos Christus? nec tanti est Deus? nec tanti cælum est, & æterna salus? & necdum extorqueri à vobis potest vel unicum, sed serium & ex pectore promptum verbum: Ignosco, dimitto; condonet Deus, quicquid in me à quocunque peccatum est. Adhuc, saxa statis sine sensu, sine voce, sine motu ullo ad veniam? adhuc ferreus vester animus spirat vindictam? adhuc clamat: Inimico mala crux, inimico mala omnia? adhuc vociferamini: Inimicis ultio, inimicis mors, inimicis omnes diræ?


diræ ? Ergo adhuc in inimicum durant odia ? ergo necdum imperantem Christum auditis ? Ite jam , ite vos tales Christiani , quacunque libet via , non errabitis : secure & certo , ad illud quo tenditis , diaboli regnum perventuri. Ite compressis oculis ; ad inferos jam quævis semita vos ducet : ad hunc viæ terminum non certius itur quam errando. Et certissimum est effatum istud: Non potest amare Deum, qui non cessat odisse inimicum.



DE

SYMBOLVM. X.

Detestatio præteritorum
peccatorum.



*Veniam tibi cito, et mouebo
candelabrum tuum de loco suo,
nisi pœnitentiam egeris. Apoc. 2.*

DECIMUM
PRÆDESTINATIONIS
SIGNVM.

SYMBOLVM X.

FLAGELLO ET VIRGIS monstra-
tur *Detestatio præteritorum peccato-
rum.* Facinus abominabile iudicat
esse Augustinus, præteritorum pecca-
torum meminisse, & inde gloriari ac
gaudere, cum de illis magnopere dolen-
dum sit, & contra nitendum; nam, ut
idem Augustinus vere affirmat: *Qui lib. 5.
pectus suum tundit, nec corrigit, pec- de lib.
cata solidat non tollit. Lugens David arbitr.*
de se pronunciat: Peccatum meum *Ps. 50.*
contra me est semper: ideoque Deum
tam efflictim rogat: Cor mundum crea
in me Deus, & spiritum rectum innova
in visceribus meis. Beati qui sic lugent
& odio tam generoso peccata detestan-
tur, hoc ipsum dolentes quod non satis
doleant; ex hoc ipso tristes, quod mi-
nus quam par sit tristentur. Et hæc quæ *2. ad
secundum Deum tristitia est, pœniten- Cor. 7.*
tiam in salutem stabilem operatur. In
stabilem salutem, inquit Apostolus,
quod attentissime considerandum. Mul-
ti salutem per pœnitentiam recuperant,
sed heu non stabilem salutem. Ideo
Christus disertissime monet: Nisi pœni- *Luc.
13.*
tentiam habueritis, omnes similiter per-
ibitis,

ibitis, explicate præcipit, non agendam tantum, sed habendam esse pœnitentiam, eamque retinendam. Nec enim ut statim temporis mutuum, quærenda est pœnitentia, non transvolare permittenda, sed certo perseverandi proposito firmanda. Ita D. Thomas

Par. 3. Aquinas: Vera, inquit, & seria pœnitentia, non tantum à peccatis præteritis expiat, sed etiam præservat à futuris.
quest. 48.
art. 8. Non habet pœnitentiam, qui non habet propositum firmissimum non amplius in priores noxas relabendi.

Ioan. 5. I. Christus paralytico, quem sanavit, præcepit lectulum ut tolleretur: Et
Marc. 2. mox sustulit grabatum suum, & ambulabat. Occasiones peccati cavendæ, tollendæ, removendæ sunt, & sic ad honesti rectique metam currendū. Evangelicus prodigus extrema fame tabescens: Surgam, inquit, & ibo ad patrem meum. Nec tantum dixit iturum se, sed ivit. Et surgens venit ad patrem suum. Hic plerique omnes & manuum & pedum usum, nostra culpa amittimus. Lingua valemus, non opere: ore strenui, languidi manu. Arcum intendimus, nec tamen sagittam emittimus: proponimus facturos, non facimus. Post commissas noxas gemimus, sed ne committamus, oscitanter cavemus. Nimirum vulnus obductum cupimus, & sanguinem non sistimus, peccatis medelā admovemus;
 & af-

& affectum ad ea, non tollimus. Differendo & procrastinando senescimus. ita dum proponimus & promittimus, abijt vita, & inter merum & pigrum *velle*, tota evanescit. Sic demum in longis nos propositis mors deprehendit, ridetque tot annis voluisse facere, fecisse nunquā. Augustinus olim talis, sed non diu talis, mature fecit idque ante senium, quod vidit sibi esse faciendum. Dicebam, inquit, *lib. 8. Confes. c. 11.* apud me intus : ecce modo fiat, modo fiat. Et cum verbo jam ibam in placitum, jam pæne faciebam & non faciebam, nec tamen relabebam in pristina, sed de proximo stabam & respirabam. Retinebant me nugæ nugarum & vanitates vanitatum, antiquæ amicæ meæ, & succutiebant vestem meam carneam & submurmurabant : Dimittisne nos? Dimisit certe & excussit jugum: vitam priorem omnem sic detestatus est; ut aliam viveret.

II. Nos sæpe quidem meliorem vitam incipimus, sed hoc tantum; nec talem hanc perteximus, in cæptis non modo non pergimus, sed & in antiquam silvam redimus. Sunt, quis dubitet; multorum pii conatus, sanctæ cogitationes, optima consilia, castissima proposita: sed plerique Athenienses sumus, optime discernimus, pessime exequimur, aut certe in exequendo non persistimus. Modos vivendi honestissimos ac plane salu-

salutares nobis præscribimus , sed cui-
vis mox tædio molestiæque cedimus:
sancta proponimus & grandia , sed ubi
rebellem carnem , invitantes socios , al-
licientem Dæmonem sentimus , non in-
viti manus damus , & ad priores vitæ
sordes , nos retrahi non prohibemus , in-
stabili prorsus & nimium brevi pœni-
tentia. Decrevisti , mi optime Christiane ,
vitam instituere castiorem , occasiones
cavere , oculis in amore ducibus impe-
rare , carnis petulantiam edomare recte ,
cœpisti verecunde loqui , paginas im-
puras averfari ? pulchre. Proposuisti bi-
lem substringere , & iræ moderari , om-
ne odium deponere , invidiam omnem
animo pellere ? optime. Instituísti lin-
guam coërcere , filere cum alii verbis
detrahunt , sustinere cum dicteris la-
cessunt ? omnia præclare , & ad normam
veræ pœnitentiæ. Quanto vero præcla-
rius , in hoc vitæ curriculo perseverare ?
quam multi se heri continuerunt , linguā
& libidinē represserunt , iram fregerunt ,
seipfos vicerunt , qui se hodie in prio-
rem vitæ licentiam effundūt , linguæ &
libidinis jugum subeunt , iræ habenas
solvunt , vitiis ut ante serviunt. Non est
vera , quæ non est firma & stabilis pœ-
nitentia : inconstans hæc & desultoria
mentis levitas est. O quales gladiatores
sumus , qui docte quidem ventilamus ,
erudite præludimus , sed cum mucrone
pugatorio utendum , cum in gradu
standum ,

standum, & celeres ictus eludendi sunt, ignavi recedimus, & vulnera in statu evitanda, in abitu accipimus. O quales cursores nos, qui primo itinere brachia jactamus, pedes incitamus, pæne jam sudamus: paullo post, ante viæ medium hæremus, deficimus, succumbimus. Ah, quoties præclara conamur, inchoamus cum laude, pergimus aliquamdiu spe bona, languemus paullatim, cadimus tandem, jacemus in fine. Arbor frustra flore suo triumphat, & fructus promittit, nisi & proferat. Architectus fundamenta incassum jacet, si ea non in parietes & muros excrecant. Quid navarchum juvat malum erigere, antennas aptare, vela explicare, applicare remiges, si littore navim non solvat, aut ad littus quam primum redeat? Ita nos cum architectis fundamenta jacimus, & nullū surgit ædificium: cum oratoribus crebro exordimur, vix unquam peroramus: sæpe vela damus cum nautis, sed ingruente procella, ad littus unde solvimus, redimus. Illud nobis in ore continuum: Volo facere, volo me emendare; nihil facimus, nunquam serio emendamus. Per Sacramenta rite percepta carceribus quidem evolamus, sed medio cursu frangimur, cadimus, jacemus. Et jam nullum amplius extat argumentum promissi nostri quod fecimus, aut divini epuli quod accessimus. Ita quam memores injuriarum sumus, tam obliviosi pro-

positorum nostrorum. Prudentissimum animalium censetur homo, at sibi stultissimum videri, ajebat Polybius: Nam ceteræ animantes ubi semel offenderint, cavent; non vulpes ad laqueum, lupus ad foveam, canis ad fustem temere redibunt: solus homo ab ævo in ævum peccat fere in iisdem incautum, obliviosum animal.

Isa.

e. 47.

Hier.

c. 3.

Serm.

3. in

vig.

nativ.

Dom.

Ecol.

c. 34.

Isa.

c. 56.

Exod.

9.

III. Per Isaiam queritur Deus: Non posuisti hæc super cor tuum (ô anima) neque recordata es novissimi tui. Et dixi, cum fecisset hæc omnia; ad me revertere, & non est reversa. Pœnitudo, inquit Bernardus, sine correctione non proderit. Unus ædificans & unus destruens, quid prodest eis nisi labor? qui enim baptizatur à mortuo, & iterum tangit eum, nihil proficit lavatio ejus. Veræ pœnitentiæ comes est correctio, ut jam coërceas gulam, jugules luxuriam, superbiam deprimas, & facias servire corpus sanctitati, quod iniquitati ante servierat. Hæc nos omnia facturos pollicemur: vix dies abit, sæpe nec hora, & jam pollicitorū obliti, redimus ad ingenium, & quod Isaias deplorat, è salubri luctu male hilarescimus: Venite sumamus vinum & impleamur ebrietate, & erit sicut hodie, sic & cras, & multo amplius. Simillimi sumus cum Pharaone ingenii: Videns autem Pharao quod cessasset pluvia & grando,

grando, & tonitrua, auxit peccatum. Ita nos post impetratam veniam, sæpissime augemus culpam. Quoties mane oviculæ sumus, leones vesperi, & sub humana fronte tigrides ! quoties mane angeli, vesperi vix homines esse deprehendimur: ita larvam aliam ex alia sumimus, & illa nobis sæpe familiarior est, quæ turpior: ita è vasis gloriæ in vasa contumeliæ mutamur, heu crebra nimium vicissitudine. Sicut autem ægrotantes, inquit, Chrysostomus, nisi semper ordinate vixerint, nulla ipsis disciplinæ per tres aut quatuor dies servatæ utilitas: sic & peccantes, nisi semper sobrii sint, nihil proderit ipsis duorum vel trium dierum correctio. Pulli gallinacei jam plumantes, sæpe per domesticum atrium musculas & vermiculos, pabuli sui delicias venantur, interim eos sublimis per aerem milvus curiose numerat. Atque cum jam volans ille fur, cunctabundo motu, eodem pæne loco pendulus circumtuetur, & quærit quorsum in prædam superne sese ruat fulminis vice, de cœlo improvisus adest, & incuriosam ex his avem rostro transfodit, secumque trepidantem sub ungue cibum avehit. At pulli ceteri, metu celeres sub matris alas coëunt, sed non diu latent; mox metum omnem obliti & tegi recusantes, è plumatili latibulo secure provocant, tota area in pastum, ut prius, effusi. Sed adest iterum alatus prædo, & pullū

*Hom. 3
ad pop.*

alterum subito abripit. Diffugiunt iterum pavidī, & notum aſylum, maternas alas repetunt. Sed hic mali metus nunquam eſt diuturnus, & tamdiu luſus iſte utrimque luditur, dum pullis area vacuatur. Non impari luſu nobiſcum mors ludit: hic vicinum nobis, illic cognatum, amicum ibi abripit. ingemiſcimus, & quia propinquum malum non ſine cauſſa credimus, trepidamus etiam, moreſque ſanctiores promittimus. Sed quandiu hæc pia trepidatio, quandiu hi gemitus? it unus aut alter dies, & iterum vermiculos paſſim ſequimur, jamque & lacrimarum & gemituum obliti, ad hilares cachinnos & calices; ad lucella injuſta, ad ejuratas libidines, ad vitiorum noſtrorum circulum redimus, & ad priſtinam vitæ conſuetudinem libere provocamus, tamdiu male ſecuri, dum ultimæ nobis fluant lacrimæ, & mortis ungues jam noſtro hæreant pectore. tunc velle facere, nimis ſerum; feciſſe ſolum juvat; & quod durum erat pati, tunc meminſſe dulce eſt. Sed hæc neque aliis, neque nobis ipsis ſatis credimus: peccata deteſtamur quidem hodie, cras eadem, sæpe plura & graviora repetimus. Luidimus cum bono Deo; vix facta deſlevimus, mox iterum deſlenda facimus, ita catenam neſtimus è vitiis. quod deſlet Iſaias, & minatur: Væ qui trahitis iniquitatē in funiculis, & quaſi vinculū plauſtri, peccatum. hic mos noſter eſt,

peccata

peccata alia atque alia, aliis atque aliis peccatis accumulare, ac plerunque in pejus proficere. & quemadmodum Antiochus Epiphanes bonus puer, sed malus juvenis, & vir pessimus fuit: sic iisdem pæne gradibus & nos abimus in profundum. deletis namque per pœnitentiam & exomologesin culpis, prima forsan hebdomade calemus, altera tepescimus, frigemus tertia. demum omnis bonus spiritus evanescit, & rursus morimur. O lunas, non uno duntaxat mense, nec hebdomade una, sed uno quandoque die crescentes & decrecentes, opulentas & inopes. & quot Euripos in angusto pectore circum gestamus? quoties è bona oliva in oleastrum turpiter degeneramus? heu volubilitatem & inconstantiam, non fortunæ quæ sensim fit pessima, cum esse bona desinit. Impius facit opus instabile.


*Prov.
c. II.*

Iustorum autem semita quasi lux splendens, procedit & crescit usque ad perfectam diem, peccata prædestinati sic detestantur, ut ea penitus aversentur; non tutum arbitrantur, hunc cum Deo lusum reciprocare, ut peccata commissa defleant hodie, cras iterum deflenda committant. Dei semel offensi nunquam obliviscuntur, nec sine gemitu recordantur condonatae offensæ. Hinc amplissimam à Deo gratiam ineunt. Offensum se Deus obliviscitur, si nos offensi cum dolore recordemur.

*Prov.
c. 4.*

SYMBOLVM. XI.

Voluntatis in bonum
propensio.



*Inclinaui cor meum ad faciendas
justificationes tuas in æternum,
propter retributionem. Psal. 118.*

V N D E C I M V M
P R Æ D E S T I N A T I O N I S
S I G N V M.

S Y M B O L V M X I.

ANCHORA, est *Voluntatis in bonum propensio*, quæ sese tunc demum erit, cum quis firmissime statuit, nullum unquam gravius peccatum committere, etsi bonorum omnium ipsiusque vitæ facienda sit jactura.. Iuravi *Psal.*
& statui custodire iudicia iustitiæ tuæ. 118.
Quod si cor nostrum non reprehenderit nos, fiduciam habemus ad Deum. Lu- *I. Ia. 3*
dovicus Granatensis : Reprobationis, inquit, signum mihi certum videtur, facilitas letaliter peccandi, sine doloris sensu. Nimis est malus, qui quod bonum est, nec serio quidem vult velle : magna pars bonitatis est, velle bonum fieri. Cœlo prædestinati, ut nil unquam mali velint, id volunt unice, quod vult Deus. Omni hora & momento clamant cum Paulo : Domine quid me *Act. 9.*
vis facere ? Non est quidquam quod pro te pati recusem : nihil mihi nimis acerbum aut arduum, nihil difficile nimis erit aut inexpugnabile : omnia superabo tolerando ; pervincam & expugabo omnia, Deo meo duce & adiutore. Et quicquid viribus non potero, id ardentissimis desideriis consequar : quo-

cunque me pedes non tulerint, eo cogitationum alæ perducent: & uti solares herbæ ad suum solem, sic ego semper ad tuam, Domine, voluntatem me vertam. In capite libri scriptum est de me, ut facerem voluntatem tuam, Deus meus volui, & legem tuam in medio cordis mei, in medio memoriæ, intellectus, & voluntatis meæ illam reposui. Bernardus ad hoc divinæ voluntati præstandum obsequium promptissimus: Pauperculus ego, inquit, non habeo nisi unum minutum, voluntatem meam, & non dabo illam ad voluntatem illius, qui toto se totum me comparavit? Æquum omnino est, ut *voluntas divina* regula sit humanæ voluntatis & anchora. Epictetus: Constatui, inquit, & conformavi voluntatem meam divinæ. Vult me febricitare? & ego volo. Aliquid aggredi? volo. Potiri? volo. non potiri? nolo. Mori? volo. Quis jam igitur prohibere me aut cogere præter voluntatem potest, non magis quam ipsum Deum? Turpe, hæc olim à priscis in cæcâ nocte verlantibus visa, à Christianis ad clarissimum solem cæcutientibus non videri. *Fiat voluntas tua; tua, ô mi Deus, tua voluntas fiat, sicut in cælo & in terra.* Quare accingimini & estote filii potentes, ut pugnetis adversus nationes (contra insultus vitiorum) sicut autem fuerit voluntas in cælo, sic fiat.

Serm.
de qua.
dib.

Diff. 3.
cap. 26

I.
Ma-
hab. 3.

I. Horologia urbana, primum unum sequuntur omnia; cur non & omnium hominum voluntates, velut minuta horologiola, ad illud cœleste magnū, ad unicam divinam voluntatem dirigantur? Sicut fuerit voluntas in cœlo, sic fiat. Dicitur non potest quam hoc Deo sit gratum. gratulatus ipse sibi Deus velut de re maxima: Inveni, inquit, David filium Iesse, virum secundum cor meum, qui faciet omnes voluntates meas. Ergo diu quæsit Deus, quæritque ejus animi & voluntatis hominem qui id solum, in omnibus, semperque aut nolit aut velit quod ipse. Hoc tali reperto homine, gaudium non dissimulat benignissimus pater: Inveni qui faciet omnes voluntates meas. Ideo & ipse Dei filius omnem suam ad patris voluntatem composuit: Descendi de cœlo, non ut faciam voluntatem meam, sed voluntatem ejus qui misit me. Ab hac bonæ rectæque voluntatis norma nimis remotus est, qui non tantum non ad nutum, sed nec ad imperium obedit. Sapiens timet & declinat à malo, stultus transilit & confidit. Hoc est comedere, ac tergere os suum, & dicere, non sum operatus malum. Qui hujus animi est, oppignerat animam diabolo, & ridet; cœlum perdit, nec damnum sentit, tanquam inter omnia damna levissimum.

Aft.

13.

Ioan. 6

Prov.

14.

Prov.

30.

I I. At contra, cœlo destinati sic animum in bono stabiliunt, ut omnem mali speciem, & vel umbram peccati perhorrescant : non sinunt id sibi placere quod Deo displicet, in id solum totamente pronissimi, quod, etsi displiceat omnibus, modo uni sciant placere Deo, hoc cogitant, hoc & loquuntur, nec dubium quin sæpius eorum voluntas sic ignescat, ut præ Epicteto longe religiosius exclament : Deus meus, amor meus ! absit hoc à me, ut quod tu vis, ego nolim ; aut quod tu non vis, velim ego, tua voluntas, mea est voluntas ; imo mea jam amplius mea non est, quia tua esse cœpit ; & ideo tua mihi jam sequenda est, quia mea esse cœpit. Idem ego velle debeo, quod tu, & vero etiam, ô Domine, volo. Ægrotare me vis ? volo. Pauperem esse ? volo Domine. Doloribus affligi ? hoc volo. Contumeliis & injuriis affici ? etiam volo. Contemni atque despici ? & hoc volo, quantumvis id graviter sentiam. Vis me destitui solatiis ? volo. Animi angustiis premi ? volo, etiamsi tu, mi Domine, id me velis ad extremum usque judicium perpeti. Vis me rebus charissimis spoliari ? difficile est quidem amata relinquere, tecum tamen hoc ipsum volo. Etiam mori me vis ? inter difficilia omnia, difficillimum hoc est, tamen centies mori non recuso, modo divinis sanctissimæ
volun-

voluntatis tuæ brachiis immoriar. Vis me præmature mori? volo, vel reluctantem natura. Vis me cœlo adscribere? volo, ô Domine, volo. Inferno addicere? Ah! bone Iesu, ut tu tua hoc velles sententia, factis ego meis volebam & merebar; sed ut ego hoc nollem, & volebas tu & merebaris tuo sanguine. Atque si fieri posset (uti sane non potest) alterutrum istorum, aut æquissimam tuam voluntatem esse irritam, ut ego beatus sim; aut me damnatum esse, ut iustissima tua voluntas sit rata; proclamo: melius est daminari me, & servari quod tu vis, ô Deus. Sed ô bonitas, mortem meam, scio, non vis, qui filii tui mortem ideo volebas, ut posses non velle meam. Per illam ergo filii acerbissimam mortem te rogo, ô pater, ab æterna morte me serva. En vulnera, en sanguinem quo tibi pro me litatum est: filio nolebas parcere, ut posses servulo. Ego mancipium tuum. O rex immortalis, ad omnem arbitrii tui motum versari me patiar: suave mihi erit quicquid à voluntate tua evenerit. Paratum cor meum, Deus, *Psal.* paratum cor meum. Hos amat cœli *107.* monarcha famulos qui heriles nutus oculo tam vigilante observant, ut Domini voluntas, lex fiat servi, qui semper explicata fronte dicat: Dominus est, quod bonum est in oculis suis faciat. *Ecd.* Nihil enim melius est quam respicere *c. 23.* in mandatis Domini.

III. Suum illud nobile monitum commendent Græci : Ne quid nimis. *Psal.* Tu sane, ô Deus , tu mandasti mandata tua custodiri *nimis*. Servos suos vult Deus ad omne præceptum , & ad omnem nutum paratos promptos, qui vel uno etiam die , vel etiam afflictissimi, millies tamen corde & ore dicant, *quod Deus vult*. Ita quidquid hi tam bonæ mentis homines volunt, hoc vult Deus; nam illi constantissime nolunt , quod Deum averfari sciunt & nolle. Ita hi tales , quicquid defiderant , impetrant, quandoquidem non aliud unquam defiderant , quam ut ad unam & unicam Dei voluntatem se conforment; sciunt enim quam vere Hieronymus de obitu Blæfillæ scripserit ad Paulam : Bonus est Deus , & omnia quæ bonus facit, bona sint necesse est. nec illi bonæ voluntatis homines pro malo habent quicquid à bono Deo est. Sani sunt? gratias referunt conditori. Languent? & in hoc Domini sui voluntatem agnoscunt & laudant. Charorum orbitas irrogatur? plangunt quod accidit; sed quia sic placere norunt Domino , animo sustinent æquissimo. Unicus rapitur filius? durum quidem , sed tolerabile; quia sustulit ille qui dedit. Imminet dura pauperies, aut gravior pauperie morbus? contemptus affligit aut contumelia? injuriarum agmen lacescit? alias sibi voces elabi non sinunt quam


quam istas : *Sicut Domino placuit, ita factum est, ita bene factum; etiam in hoc laudetur Deus.* Benedictus Deus in æternum. Hac bona voluntate, velut anchora, stabiles supremam expectant horam, & breve putant omne malum, quod finis melior subsequetur,



D V O.

SYMBOLVM . XII .

Moderatio affectuum.



*Sub te erit appetitus eius, et
tu dominaberis illiut. Genes. 4.*

DVODECIMVM

PRÆDESTINATIONIS

SIGNVM.

SYMBOLVM XII.

CITHARA, qua exprimitur *Mod-
ratio affectuum, seu, victoria tenta-
tionum.* Qui Christi sunt, carnem *Ad Galat. 5.*
suam crucifixerunt cum vitiis & concu-
piscenciis suis, libere clamat Paulus.
Eleganter Bernardus de Christo nos ad
se invitante: Qui vult venire post me, *Serm. de S. Andr.*
abneget semetipsum, ac si dicat: qui
me desiderat, se despiciat; & qui vult
facere voluntatem meam, discat fran-
gere suam. Quod autem pugnantem
fatigat, vincentem coronat. Et hoc est
lucrari vitam, quotidie sibi suisque af-
fectibus mori. Vbi affectus vivunt, ibi
aut cæca, aut mortua est ratio. Ideo
sanctissimus David: Revela oculos meos *Psal. 118.*
& considerabo mirabilia de lege tua.
Scio Domine in lege tua magna & sub-
limia secreta contineri, sed ego homo
sum, carne pressus, & variis affectibus
obnoxius, nec ignoro, quanta sit vis il-
lorum qui mentem meam turbant, &
excæcant: tuæ igitur pietatis sit ape-
rire oculos meos, & offusam ab affecti-
bus caliginem dispellere. Vere de af-
fectibus Seneca: Facilius est initia eo-
rum prohibere, quam impetum regere. *Epist. 85. 116.*

Nam sicut in præceptis dato corpori nullum sui arbitrium est, nec resistere dejectum potest, sed omne consilium irrevocabilis præcipitatio abscidit: Ita animus si in iram, amorem, aliosve affectus se projecerit, non facile reprimet impetum; rapiet illum ad imum vitiorum proclivis natura. Optimum igitur ipsis repugnare seminibus, cujus-
cunque demum malignioris affectus. In confinibus arcendus est hostis, nam ubi portis se intulerit, modum à captivis non accipiet. O quanto melior est patiens viro forti, & qui dominatur animo suo, expugnatore urbium.

Prov.
16.

*Lib. I.
de
Serm.
Dom.
c. 2.*

I. Augustinus: Beati pacifici, inquit, in seipsis, qui omnes animi motus componunt & rationi subjiciunt: beati qui carnis concupiscentiis edomit, regnum fiunt Dei, in quo nihil non ordine agitur, in quo mens imperat, non reluctantibus famulis, corporis sensibus. Hæc illa pax ab Angelis, nascente Christo, proclamata, sed ea non nisi per arma & pugnas obtinetur. Cur enim Deus inter bellicos tubæ clangores Mose legem in manus tradidit? num mitior & suavior musica, religioni Ecclesiasticæ, quo lex spectabat, non fuisset convenientior? castris tuba quam templis est aptior. Et nos, mi Christiane, ad castra vocamur, & ad confictus ab eo, qui legem dedit. legem non
fer-

Exod.
19.

servabit, quisquis contra legis hostes pugnare detrectaverit. Carnem suam nemo vicit blandiendo: suadentem Diabolum, Mundum seu blandientem, seu favientem sine pugna nemo superavit; resistendum est & luctandum cum omni affectu, quem hostes divinæ legis concitant. qui suis solum noxis irascitur, & affectibus indulget, is malæ arboris ramos amputat, sed salva radice: rami repullulabunt. Ita Chrysostomus Christi verba expendens: Qui viderit mulierem ad concupiscendum eam, jam mœchatus est eam in corde suo. Non modo, inquit, morbum, sed & morbi radicem evellit Christus. Radix adulterii concupiscentia est impudica. Quare non solum plectit adulterium, sed & concupiscentiam, matrem adulterii. Ita non tantum cædes prohibet, sed & iram ad illas ducem, sed & contumeliosa verba iræ fomenta. Iracundia & amor, duo violentissimi affectus sunt, nec leges admittunt, nisi serias & severas; blandis præceptiunculis vix emendantur. Ira non aliorum vitiorum more sollicitat animum, sed abducit, imo præcipitat. Et quamvis nemo velit tam graviter ferire hostem, ut manum in vulnere relinquat, seque ab ictu revocare non possit: tale tamen telum est ira, vix retrahitur cum longius excurrere cœperit. Ira non abhorret ab ullo scelere, & si quem sibi destinavit suo fulmi-

ne tangendum, non nisi letali plaga lenitur. Iracundus, velut pyrites lapis, quacunque sui parte cum filice collidatur, ignem vomit. Vir iracundus provocat rixas, & qui ad indignandum facilis est, erit ad peccandum proclivior.

Prov.
29.

Eccl.

27.

Job. 5.

Lib. 4.

de Civ.

9. 6.

Epist.

18.

Lib. 2.

de Ira

6. 12.

Ira & furor utraque execrabilia. Et vix ulla pestis humano generi pluris stetit. Nam virum stultum interficit iracundia, & parvulum occidit invidia. Itaque fratres amantissimi, inquit Augustinus, ne, obsecro, tantum malum nobis inducamus; animæ morbum, rationis tenebras, à Deo alienationem, oblivionem familiaritatis, principium bellorum, plenitudinem calamitatum, dæmonem pessimum. Qui quidem tanto magis cavendus est, quo plures quotidie invadit. In omnes personas inquit Seneca, hic exardescit affectus: tam ex amore nascitur, quam ex odio: non minus inter seria quam inter lusus & jocos. Nec interest ex quam magna causa nascatur, sed in qualem perveniat animum. Sic ignis non refert quam magnus, sed quo incidat. Nam arida scintillam quoque foveat usque in incendium. Atqui nihil est, ait, tam difficile & arduum, quod non humana mens vincat, nullique sunt tam feri & sui juris affectus, ut non disciplina perdomentur. Quodcumque sibi imperavit animus, obtinuit. Quantum vero est, effugere maximum malum, Iram, & cum

cum illa rabiem, sævitiam, crudelitatem, furorem, & alios comites ejus affectus?

I I. Quod Romanus hic sapiens dixit de ira, idem hoc de notissimis furiis Superbia & Invidia, idem de nequissimis fororibus Luxuria & Gula, deque omni vitiosorum affectuum exercitu dicendum: Quantum est, hæc mala maxima effugere, & ad beatam tranquillitatem, & quandam quasi harmoniam, ac omnium cupiditatum concordiam, animum componere? Beatus ergo ille, qui tanto minorem affectibus libertatem indulget, quanto minus ipse vult servire vitiis: & ut rationi suum stabiliat sceptrum, crucem statuit affectibus. Ad triremes damnati, certas habent, tamen et si breves remorum ferias, subinde sua membris est quies: qui affectibus serviunt, quieto nunquam vivunt animo: unus ex alio cogitationum tumultus nascitur: Servietis diis alienis die ac nocte, qui non dabunt vobis requiem. *Hier. c. 16.* Idcirco Ecclesiasticus: Post concupiscentias, inquit, tuas non eas. Equus *Ecd. c. 18.* refractarius fræno coercendus; deses, calcaribus urgendus. Idem affectibus faciendum, quorum aliquos impellendo, plerosque retinendo melius regas. Nemo magis odisse se potest, quam qui sic perdit se amat, ut in voluptates immodice solutus, nec impetrare sibi, nec

Rom. 8 negare quidquam possit. Sed sciant hi, quid eis vaticinetur Apostolus: Si, inquit, secundum carnem vixeritis, moriemini, si spiritu facta carnis mortificaveritis, vivetis. Nemo majus obtinet imperiū, quā qui ipse sui est Dominus; non est inferior servitus quam suis servire affectibus; nec illustrior est triumphus, quam parta de seipso victoria. Brevis hic conflictus, præmium æternum. Affectus suos vicit, qui eis servire non vult. At servit, ait Ambrosius, quicumque metu frangitur, vel delectatione irretitur, vel cupiditatibus ducitur, vel indignatione exasperatur, vel mœrore dejicitur. Nec ulla servitus turpior est, inquit Seneca, quam voluntaria, cum alius libidini, alius avaritiæ, alius servit ambitioni. Bonus, Augustino teste, etiamsi serviat, liber est: malus, etiamsi regnet, servus est; nec unius hominis, sed quod gravius, tot dominorum quot vitiorum. Cupiditatem vero non magis unum genus ac ratio est, quam vultus humani & formarum, quæ, cum ex æquo homines sumus omnes, maximam habent varietatem, sic alii aliis rebus afficimur, neque omnes iisdem æqualiter delectamur. Hic in libidines exæstuat, ille auro capitur, hunc strangulat invidia, iste portando sibi quærit exitium, alius otando aut ludendo. Nemo ea quam sibi fingit, perire se putat beatitudine, perinde

*Lib. 2.
de Iacob &
Vita
beata.
Sen.
epist.
47.*

inde atque si minus suffocaretur qui
 in vino submergitur, quam qui in a-
 quis. Recte diuus Gregorius asserit: *Lib 4.*
 Reprobæ menti valde placet quod con- *in 1.*
 cupiscit, sed in æterna pœna, quod ei *Reg.*
 modo est dulce, amarescit. O miser, *c. 4.*
 species te decipit, & concupiscentia *Daniel*
 subvertit cor tuum, ut aquas fugaces *c. 13.*
 ore decepto appetas. Et quæ hominis
 beatitudo sit libido? de qua Ambro-
 sius: Febre, inquit, libido flagrantior est,
 graviusque inflammat, & præcipitat:
 sed ubi quis resipuerit à furore, tunc
 conscientia visus aperitur, & sui unus-
 quisque facinoris pudendam turpitu-
 dinem erubescit. Tunc Deus timetur,
 & peccator se celare cupit, sed non po-
 test; patet deformitas, nudum enim est
 Deo omne secretum, & peccator divi-
 num mente conscia iudicium formidat.
 Pecuniæ fames, ad omne scelus egregi-
 um calcar, non sedatur lucro, sed inci-
 tatur, nec minus animum quæsitis tor-
 quet quam quærendis, cumque cetera
 vitia senescente homine senescant, sola
 juvenescit avaritia. Odium porro &
 invidia pertinacissimi morbi, nec qua
 reliqui affectus facilitate sanabiles, nisi
 in cunabulis pereant. Gulæ vero qui ser-
 viunt, malam certe dominam habent,
 quæ tanto sit imperiosior, quo fidelio-
 rem nacta est servum, & quia cognata
 habet Lasciviam Gula, tanto plus
 ea nocet castimoniam, quo plus illecebris

Tob. nutritur. Quis jam ille, & laudabimus
6.3. eum, qui cum Tobia gloriatur: Mundam servavi animam meam, ab omni concupiscentia: hoc enim est omnes citharæ fides in concordiam componere?

1. Reg. III. Saul Agagum regem carcere
15. damnavit, quem Dei jussu, capite debuisset. Nos quoque non minus turpi clementia in affectus nostros statuimus, & jugulandos non necamus, sed solo mulctamus carcere, cum id potissimum cavemus, non ut extirpentur, sed ne fæde prorumpant foras, licet intus sæviant. Ita dum latenti hosti parcimus, eum in nos ipsos armamus, ut quod principio lapsus fuerat & error, paulatim mos fiat & consuetudo, ex qua demum vitiosissima oriatur necessitas. Ita sensim ab hoste domestico undique oppressi, clamamus: Non possum me hîc vincere: assuetis carere non possum, mori me cogit, qui hanc mihi delectationem eripit. Sic errores nostri in mores abeunt; & quia malignos affectus non in herba opprimimus, sed crescere permittimus, tandem silvam crevisse cernimus, & ingens dumetum, quod nullis pæne viribus amplius convelli possit. Sed neque hîc desperandum, cum etiam consuetudo expugnari queat consuetudine meliori, & tanto futura sit corona pretiosior, quo diffici-

fior pugna : volenti cum bono Deo vincere, certa est victoria. Modo Mo- *Exod.*
 ses marinos fluctus virga increpet, ce- *14.*
 tera curabit Deus, & tutus transibit
 Israel, & tota mergetur Ægyptus.
 Amorrhæus & Chananæus nostris con-
 finibus exterminabuntur, modo disca-
 mus certare cum hostibus, & habere
 consuetudinem præliandi. Militia est *Iob. 7.*
 vita hominis super terram. Nemo sibi
 ipsi fidat, periculosiorem etenim insidia-
 torem & hostem nemo habet, quam
 seipsum, cum quo nullæ satis tutæ pos-
 sunt esse induciæ : neque securum est,
 prius claudi hoc hominis armamenta-
 rium, quam aperiri sepulchrum. Sem-
 per in armis excubet, cui cordi est re-
 portanda de tot hostibus victoria. Pul-
 chre Cyprianus : Voluptatem, inquit, *Cyprianus de*
 vicisse, voluptas est maxima; nec ulla *Bono*
 major est victoria, quam ea quæ à cu- *pusdicit.*
 piditatibus refertur. Qui enim hostem
 vicit, fortior fuit, sed altero : qui vero
 libidinem repressit, fortior fuit seipso.
 Citharædus tamdiu discordes inter se
 chordas ad musicam legem attemperat,
 dum in symphoniam consentiant: Præ-
 destinatus tamdiu turbatos inter se af-
 fectus conciliat, dum religiosæ paci non
 contradicant. Si Platoni credimus, cor-
 pus nostrum cithara est, citharædus est
 animus, cui nunc hæ, nunc illæ fides
 tentandæ; modo lex oculis, modo lin-
 guæ ponenda; modo aures, modo

manus astringēdæ; Nunc luxuriæ, nunc impatientiæ affectus, ad debitā normā revocandi. Peritus sane citharædus fuit

1. Cor. 9. qui dixit: Castigo corpus meum & in servitutē redigo. Prædestinati princeps cura est, ut quotidie citharam suorum affectuum examinet: & jam cum iracundia sua litigat, nunc invidiam reprehendit, modo suam somnolentiam extimulat, mox lætitiā refrænât, inde tristitiā mitigat. semper his suis chordis oberrat, totiesque vel remittit, vel severius intendit, donec in harmoniam conspirent. Nihil suis affectibus indulget prædestinatus, nemini minus parcit quam sibi, deprehensam in se ream cupiditatem, non nisi ad crucem absolvit. Signum itaque prædestinationis est & istud: Qui Christi sunt, carnem suam crucifixerunt cum vitiis & concupiscentiis suis.

S I G N O R V M

D E

P R Æ D E S T I N A T I O N E

E T

P R Æ D E S T I N A T O R V M

P A V C I T A T E

C O R O N I S.

Dictis addat coronidem mellifluus doctor, Bernardus : Novit Dominus, inquit, qui sunt ejus, & *Serm. 2. de octav. pasch.* solus ipse scit quos elegerit à principio, quis vero scit hominum, si est dignus amore vel odio ? quod si, ut certum est, certitudo nobis omnino negatur, nunquid non tanto delectabiliora erunt, si qua forte electionis hujus signa possimus invenire ? quam enim requiem habere potest spiritus noster, dum *prædestinationis* suæ nullum adhuc testimonium tenet ? Fidelis proinde sermo & omni acceptione dignus, quo salutis testimonia commendantur. Hoc sane verbo & electis consolatio ministratur, & subtrahitur reprobis excusatio. Cognitis siquidem signis vitæ, quisquis hæc negligit, manifeste convincitur, in vano accipere animam suam, & pro nihilo habere terram desiderabilē. Iure nemini nisi sibi ipsi culpam impingat, qui nullum

lum in se *prædestinationis* signū deprehendit. Non cæca fortitione, cœlo vel inferis, hos vel illos prædestinavit Deus.

Act. Notum à sæculo est Domino opus suum. Ita ex *prævisis omnium meritis*, vel his

Resp. 3 ut rectissime dixerit D. Prosper : Non
ad cap. ex eo necessitatem pereundi habue-
object. runt, quia prædestinati non sunt; sed i-
Gallie. deo prædestinati non sunt, quia tales fu-
turi ex voluntaria prævaricatione præ-

Lib. 1. sciti sunt. Consentit Augustinus: Non
ad odit Deus Esau hominem, sed Esau pec-
Simpli. catorem. Nihil enim in homine, Deus
q. 2. aliud odit, nisi peccata. Idem : Solum,
Epist. ait, peccatum viam obstruit ad cœlum.
105.

Omnes quidem metam ad unam pro-
peramus, sed heu quam diversis semi-
tis & imus, & currimus, & perimus!
Arcta via Vitæ; mollis, rosea, & *lata per-*
ditionis : asperitas montium illic, hîc
vallium declivia. *Facilis descensus Averni.*
Clamat Veritas, monet & adhortatur;

Matt. Intrate per angustam portam, quia lata
7. v. porta & spatiosa via est, qua ducit ad per-
27. ditionem, & MULTI sunt qui intrant per
eam : quam angusta porta & arcta via est
qua ducit ad vitam, & PAUCI sunt qui
Luc. inventiunt eam ! Idem denuo ingerit:

13. Contendite intrare per angustam portam, quia
v. 23. multi, dico vobis, quarent intrare, & non
poterunt. Vere angusta hæc est semita,

Rom. qua non nisi uni & sine comite licet
2. incedere. Vnusquisque nostram pro
se

ē reddet rationem Deo : unusquisque *Gal. 6.*
 bonus suum portabit : unusquisque pro- *1. Cor.*
 priam mercedem accipiet secundum 3.
 suum laborem. Et hoc est quod inge-
 miscens Christus : *MULTI sunt*, inquit, *Matt.*
vocati, *PAUCI vero electi*. Hoc unicum *20.*
 verbum, *PAUCI*, velut horrendum & *et 22.*
 inauditum tonitru, magnam orbis par-
 tem ē vitiorum veterno excitavit : ex
 urbibus in antra atque horridas solitu-
 dines non paucos expulit, & quot cen-
 tena Martyrum millia in catastas & e-
 quuleos, in rotas atque rogos, in cruces
 & bestiarum fauces, in armatas torto-
 rum manus egit? vox una erat illorum
 omnium : Mori nobis facile est, modo
 demum vivere liceat, inter *PAUCOS* il-
 los *ELECTOS* : ludat gladius jugulis
 nostris, modo *PAUCIS* illis sed *BEATIS*
 annumeremur. Et quis eorum non au-
 sus dicere? Si unus ego vel centum cru-
 ces vestire possim, non abnuam : si unus
 ego possim vel centum cervices securi
 porrigere, nullam subtraham : centies
 mori, jocus mihi erit, tormenta pro fo-
 mentis habebō, modo ad illam *PAU-*
CORVM in paradiso societatem admit-
 tar. Hinc illa Ignatii martyris gene-
 rosissima vox : *Ignis, crux, bestia, tota in*
me tormenta diaboli veniāt, tantum ut Chri-
sto fruār. Hoc idem ore Christi missum
 tonitru, hæc eadem vacula *PAUCI*, tot
 impuræ vitæ homines ē viridantibus
 luxuriæ pratis, in domum luctus & pœ-
 niten-

nitentiæ compegit; satius illis visum est inter paucos servari, quam cum plurimis perire, non enim minus perit qui perit in turba. Et hæc salvandorum paucitas, omni ævo proposita nobis in cautelam. De hac ipsa, justitiæ præco Noë (sic appellatur à Petro Apostolo) centenis annis & amplius concionatus est ante diluvium. At omnibus in scelere obstinatis, octo solum animæ ex omni hominum numero, in ligneo illo seu carcere, seu navigio sunt servatæ: & inter hos pauculos, impius Cham erat. Nam uti semper odoriferis proxima spina rosas jungitur, ita rarissima proborum societas est, sine mixtura improborum. Quod si Deus Sodomæam terram everurus; vel decem probos reperisset, ad Abrahami preces omnibus aliis pepercisset, sed omnis illa terra nec denarium quidem justorum aluit. Vere tunc sterilissima fuit probitatis annona. Igitur Lotho ab Angelis præcipitur: *Festina & salvere*. Ita maximo huic incendio, quo florentissimæ Sodomorum & Gomorrhæorum civitates deflagraverunt, non nisi tres homines sunt subducti: iræ divinæ signa hodieque illic locorum extant. Sed & illud servandorum paucitatem clare prænuntiabat: Cum Moses sexcenta millia virorum peditum, absque parvulis & mulieribus, educeret Ægypto, & vulgus promiscuum innumerabile sequeretur, duo

tantum

tantum è tanto numero in fertiles illas
 terras pervenerunt , ceteris omnibus
 eremus pro capacissimo tumulto fuit; in
 hoc velut unicum conditorium tot mil-
 lia mortuorum descenderunt. At vero *Exod.*
 Ægyptius tyrannus, qui populum è fu- 14.
 ga retracturus insecutus est , cum uni-
 verso exercitu , rubri Oceani fluctibus
 sepultus est. En, quot millia vivorum
 in vastissimo hoc sepulchro sint condi-
 ta? Quis non timebit te , ô rex Genti- *Hiere.*
 um ! Porro propter adoratum idolum; *c. 10.*
 proclamat Moses : Si quis est Domini, *Exod.*
 jungatur mihi, & eodem die cæsa sunt 31.
 viginti tria millia hominum. Magna
 profecto strages, quam edidit unicus ex
 auro vitulus. Tanti est coram Deo vel
 unicum peccatum. Cum Iosue civita- *Iosue*
 tem Hiericho, circumeundo & claman- *c. 2. &*
 do expugnasset, quicquid & hominum 6.
 & jumentorum in ea fuit, flamma gla-
 dioque periit ; urbs ipsa demum quasi
 unius cadaveris bustum, in altissimo ci-
 nere deflagavit , una domus à cæde
 urbisque incendio servata est immunis.
 Duce Gedeone Madianitas impugnatu- *Iud. 7.*
 ro, è triginta duobus millibus militum,
 trecenti tantum selecti sunt ad pugnam, re-
 jectis ceteris omnibus. Nullum Deus nu-
 merum curat, nisi bonorum; nec via ad infe-
 ros longa est; unico itur anhelitu, unico
 letali crimine rei læsæ Majestatis effici-
 mur, & digni æternis rogis. Ita olim *Iud.*
 propter unicum libidinosum facinus, qua- 20.
 dra.

draginta millia Hebræorū; Benjamitarū
 quinquaginta millia & sexcenti jugula-

1. Reg. ti sunt. Bethsamilæ arcam Domini cu-

6. riosius tantum intuiti, quot millium
 strage hanc oculorum licentiam lue-

runt? Non minus clare in sacra Regum
 historia, hæc prædestinatorum raritas

2. Reg. oculis subjicitur. Absalomo rebellem

15. exercitum in patrem ducente, pervolat
 cursor ad regem David, nunciatque:

Toto corde universus Israël sequitur Absa-

2. Reg. lom. Cumque etiam Seba furiosam mul-

c. 20. titudinem in suum regem concitasset,

mox alius supervenit rumor: *Separatus*
est omnis Israël à David, secutusque est Se-

ba. Mundum inspicere, & idem nunc pæ-

ne fieri dices. Christus, alter David, viam

nobis signat suo sanguine cruentisque

vestigiis, opertum spinis gerit caput, in-

famem crucis trabem fert humeris, san-

guine mixtim lacrimisque natant mor-

ibundi oculi, & hoc habitu Calvariæ

montem conscendit, & ut sequamur,

hortatur. Sed heu, quam raros habet

comites, qui cum ipso, eo quo possunt

modo, velint crucifigi? liceat dicere: To-

tus mundus in maligno positus, toto

corde sequitur non Seba, sed Satanam:

paucorum iter est in montem Golgotha

2. Reg. cum Christo. Huc illud quoque perti-

24. net, quod cum David rex elatiore spi-

ritu populum censeri jussisset, septua-

ginta hominum millia peste sunt con-

sumpta. Et ista quidem omnia, futuro-

rum umbræ , & velut prologus seu ex- *Mat.7*
ordium fuerunt concionis illius, quam *Luc.*
Christus de paucitate prædestinatorum *13.*
erat habiturus. Iudæos jam mihi nu-
mera ab Abrahamo usque ad diem mun-
do ultimam , & illa in Apocalypsi cen-
tum quadraginta quatuor millia, vix
pars erunt millesima omnium simul nu-
meratorum , ita ut ex omni eorum nu-
mero millesimus Iudæus inter prædesti-
natos non veniat numerandus. Et quod
de Hebræorum, idem de omnium alio-
rum hominum numero , salva propor-
tione, recte astringitur, nam quod Chri-
stus prædixit Iudæis & omnibus aliis
commune est, nec enim paucos tantum
ex Iudæis arcto tramite ad vitam itu-
ros, sed absque discrimine pronuncia-
vit ; *PAUCI inveniunt eam.* Huic veri-
tati confirmandæ , Prophetæ plerique
omnes acclamant. Isaias: *Dilatavit in-* *Isa.c.5*
fernus animam suam, & aperuit os suum
absque termino, quia succensa est velut ignis *Isa.c.9*
impietas, veprem & spinam vorabit & suc-
cendetur in densitate saltus, & convolvetur
superbia fumi. Vepres enim & spina erunt *Isa.*
in universa terra. Et ubi quæso libidi- *c.24.*
nis atque luxuriæ vepres non in silvam
excresecunt? ubi non surgunt densissimæ
spinæ curarum , & sollicitudinum pro
numis, non pro cælo ? Vere terra infe- *Exo.*
sta est ab habitatoribus suis, quia trans- *c.24.*
gressi sunt leges, mutaverunt jus, dissipave- *Isa.*
runt fœdus sempiternum. Omnes in viam *c.56.*
suam

suam declinauerunt. Vnusquisque ad noviss-

Hier. simum. Hieremias non minus flebili
e.5. questu hanc proborum paucitatem de-
flectens: Circuite, inquit, vias Hierusalem
& aspiciate, & considerate, & quarite in pla-
teis ejus, an inuenitis virum facientem ju-

Hier. dicitum, & quarentem fidem? æs & ferrum,
e.6. universi corrupti sunt. Non divites tan-
tum, sed quod mireris, pauperes quoque
superbire sciunt & lascivire, jamque
etiam paupertas didicit cum vitiis ha-
bere amicitiam: universi corrupti sunt,
æs & ferrum, argentum & stannum. Et
ut mali originem exploraret propheta:

Hier. Attendi, ait, & auscultavi, nemo quod
e.8. bonum est loquitur, (nimis verum nostro
hoc ævo) nullus est qui agat pœnitentiam
super peccato suo, dicens, quid feci? omnes
conversi sunt ad cursum suum, quasi equus

Hier. impetu vadens in prælium. Væ terræ, væ
e.23. hominibus, adulteris repleta est terra. Mi-
chæas æque lamentatur hanc virtutis

Mich. orbitatem: Væ mihi, ait, non est botrus ad
7. comedendum: periit sanctus de terra, &
rectus in hominibus non est. Davidi hæc

Ps.13. consideranti, exundantes lacrimis ocu-
& 52. li, ad instar fonticulorum cœperunt
fluere: Deus, inquit, de cœlo respexit su-
per filios hominum, ut videat, si est intelligens
aut requirens Deum. Omnes declinauerunt,
simul inutiles facti sunt, non est qui faciat
bonum, non est usque ad unum. Consideret
quis lacrimabilem hujus ævi statum, va-
riamque morum corruptelam, & cum
regio

regio vate sentiet, dicetque rediisse
 Noëmi tempora, aut simillima illis,
 Nam, *sicut erant ante diluvium comedentes Matt.
 & bibentes, & nuptui tradentes, usque ad 24.
 eum diem quo intravit Noe in arcam, &
 non cognoverunt donec venit diluvium &
 tulit omnes.* Ita & nunc virtus ubique
 terrarum aut exulat, aut ubi admittitur,
 non habitationis lege ut inquilina, sed
 hospitii gratia ut peregrina recipitur,
 non nimis diu retinenda. At vitium am-
 plissimi juris & dominii, regna sua non
 amplius numerat; late nimis domina-
 tur. Palliata injustitia, oculatissima in-
 vidia res suas audacter hîc agunt; &
 multo quam audacissime, exosum cœlo
 vitium, spurcissima luxuria. Sic de-
 mum proborum numerus ad paucos re-
 digitur, qui ad improborum myriadas
 collatus, Biantis dictum confirmat: *Rari
 boni, pravi plurimi.* Huic accedens Am-
 brosius: In corporatione, inquit, re-
 proborum, exigua est turba electorum.
 Nam ubique multitudo peccantium,
 ubique turba pereuntium. Vere lu- *Thren.*
 gent viæ Sion, at rident semitæ Baby- *c. I.*
 lon. Profecto, si quis mentis oculos in
 viam quæ præcipitio ad inferos immi-
 net, intendat, advertet eam tam esse
 viatoribus frequentem & celebrem, ut
 alius alium impellat ac trumat gratiosa
 compressione. Ita cuncti ad gehennæ
 flammæ, velut ad nuptias alternis ex-
 emplis properant. Non pronum est

tantum iter ad vitia, sed præceptum. Ad virtutem via ducit ardua, sed viatores hîc pauci, & fere ignoti. Præfago luctu commonens Isaias : Hæc erunt, inquit, in medio terræ, in medio populorum, quomodo si paucæ olivæ quæ remanserunt, excutiantur ex olea, & racemi, cum fuerit finita vindemia. Hoc vaticinio, bonorum raritas, racemulis & olivis pauculis, quæ post copiosam olivitatem & vindemiam pauperibus in prædam relinquuntur, improborum vero copia abundanti uvarum & olivarum segeti conferri potest. Non est enim veritas, inquit Oseas, & non est misericordia, & non est scientia Dei in terra. Maledictum, & mendacium, & homicidium, & furtum, & adulterium inundaverunt, & sanguis sanguinem texit. Nimis quam aperte proborum paucitatem Prophetæ deploraverunt.

Post Prophetarum lacrimas, eandem hanc beatorum paucitatem, in lege nova deplorant Apostoli, Ioanne affirmante; *Mundus totus in maligno positus est.* Petrus quærit : *Si justus vix salvabitur, peccator & impius ubi parebunt ?* Paulus ad Iuget : *Omnes quæ sua sunt querunt, non quæ sunt Christi.* Hoc ipsum sæpius repetit. Christus ipse : *Regnum cælorum, inquit, vim patitur, & violenti rapiunt illud.* Luc. 6. Nec interim minari desinit. *Va vobis divitibus, quia habetis consolationem vestram: Va vobis qui saturati estis, quia esurietis : Va vobis*

Epist.

I.c. 5.

Epist.

I.c. 4.

Ad

Phil. 2

Matt.

II.

Luc. 6.

Luc. 8.

vobis qui ridetis nunc, quia lugebitis & fle-
bitis. Nec auribus tantum quæ audiant,
 sed & oculis quæ videant, opponit B. *Luc. 7.*
 Luca narrante, pars boni seminis in
 saxa jacitur exiccanda, pars alia in du-
 mos & vepres spargitur soffocanda; pars
 etiam in viam abjicitur conculcanda,
 quarta pars duntaxat terram bonam
 sortitur. Sic è decem leprosis jam cu-
 ratis, unicus regressus agit gratias. In- *Luc.*
 vitati ad lautissimam cœnam, cœpe- 14.
 runt simul omnes excusare. Mota pi- *Ioan. 5.*
 scina è tot morbidis unicus sanatur.
 Vnicus Nicodemus inter Hebræos sena- *Ioan. 7.*
 tores, liberius paullo pro Christo loqui-
 tur. E tot divitibus & avaris Hierichun- *Lib. 5.*
 tinis civibus, è tot scilicet onustis came- *c. 77.*
 lis, unicus Zachæus deposita gibbi sar- *in Luc.*
 cina (sic Beda loquitur) hoc est opum
 onere relicto & per angustam portam
 ingressus, rem injuste partam restituit.
 E telonio unicus Matthæus, unica Mag- *Luc.*
 dalena è prostibulo ad vitæ innocentiam 19.
 am narrantur transisse. Paulus ante *Act.*
 Philippos urbem Macedoniæ, conciona- 16.
 tur; auditores multi, factores fere nulli;
 uni Lydiæ Christiana lex placet. Idem *Act.*
 Paulus Athenis in curia de Christo dis- 17.
 ferit: auditores non tantum multi, sed
 & docti, multi etiam irrisores, qui ta-
 men Paulo crederet, non fuit nisi Dio- *Luc.*
 nyfius & Damaris. In celeberrimo 23.
 septuaginta duorum concilio, vix unus
 aut alter reperti, qui Christi sanguinem

non firent. Sic ante crucem Domini, spectatores multi, amatores crucis aut imitatores pauci. Sic & hodie conciones multæ, mutationes morum raræ: tanguntur vitia, non extinguuntur; notari se vix ferunt, ne dum eradicari: *MULTI vocati, PAUCI electi, eheu PAUCI.* Ad fidem, inquit Gregorius, multi veniunt, sed ad cœleste regnum pauci perducuntur. Nimirum in area plus palarum est quam tritici, plura sunt arborum folia quam fructus: multi in vite pampini, paucae uvæ, multæ in rosetis spinæ, paucae rosæ; multi ubique filices, paucae gemmæ; sic & numerus eorum quos divina providentia ad beatitudinem provehet, ad improborum multitudinem collatus, est exiguus. Quam verè vaticinatus est Hieremias: *Desolatione desolata est omnis terra, quia nullus est qui recogitet corde. Qui corde scilicet, corde recogitet:* nimis volatiles sunt cogitationes nostræ, nec bono honestoque affigi se diu patiuntur: qua lubet expatiantur. Hinc exiguus gehennæ metus aut nullus, hinc frigidum cœli desiderium aut inconstans. In Christianos etiam hæc cadit accusatio: *Pro nihilo habuerunt terram desiderabilem.* Quid cœlo desiderabilius? sed quia cogitationes nostræ, raro illuc commeant, hoc etiam beatorum regnum, ut rem ignotam fastidimus, aut certe frigidissime appetimus. Et hinc spes & vires crescunt tartareo giganti

Behe-

Hom.
19. in
Evan.

Cap.
12.

Psal-
105.

Behemoth, uti de eo Iob : *Ecce absorbe-* *Iob.*
bit fluvium , & non mirabitur , & habet fi- *c.40.*
duciam quod Iordanis influat in os ejus. Ideo
idem iste patientissimus virorum : *Vere-* *Cap.9*
bar , inquit , omnia opera mea , sciens quod
non parceres delinquenti : Omnia dicta
factaque mea, imo & cogitata suspecta
mihi fiunt, dum inexorabilem Dei justiti-
am cogito. Et hoc est quod notus ille
Hilarion (de quo Hieronymus) in mor- *In vite*
te trepidat, & jam jam tribunali judicis *illius*
Christi sistendus, pavet. Modicus adhuc *c.38.*
calor tepebat in ejus corpore, nec præ-
ter sensum quidquam vivi hominis su-
pererat, & tamen apertis oculis loque-
batur : Egredere, quid times ? egrede-
re anima mea, quid dubitas ? septuaginta
prope annis serviisti Christo, & mor-
tem times ? non tam mortem timuit a-
nimus, quā imminens sibi judicium ex-
pavit. Ite nunc mei Christiani, & dum
sanctissimi viri de salute sua trepidant,
vos secure delitiamini, auri argentique
acervos struite ; alternis invidiæ morfi-
bus vosmet lacerate, & consumite ; ho-
norum venationes & gloriarum aucu-
pia instituite ; indulgete genio hilariter :
Cælum cœli domino, terram autem de-
dit filiis hominum, hîc este cives : sit
sua libertas oculis, sit & cogitationi-
bus, sit omnibus affectibus : excurrant
ii quo volunt : quidquid lubet, licere
vobis credite, nullam corpori volupta-
tem negate, curate ut vobis hîc bene sit

& suave: Ambulate in viis cordis vestri,
Eccl. & in intuitu oculorū vestrorum, & scito-
II. te quod pro omnibus his adducet vos Deus in
Eccl. iudicium. Et quamvis annis multis vixerit
ibid. homo, & in his omnibus latatus fuerit, me-
 minisse debet tenebrosi temporis, & dierum
2. Pet. multorum, qui cum venerint, vanitatis argu-
1. entur praterita. Ergo potius satagite, ut
 per bona opera, certam vestram vocationem
 & electionem faciatis. Divinæ Prædesti-
 nationis signa quæ sint, audistis. 1. Non
 amici tantum, sed & inimici sunt aman-
 di. 2. Sublevandi pauperes, non ar-
 gentea tantum manu, sed & pleno mi-
 sericordiæ affectu. 3. Adversa omnia
 sic toleranda sunt, ut Dei voluntas, in
 his etiam laudetur, & patientia conti-
 nuetur. 4. Fortunæ bona præ cælo
 nihili facienda. 5. & 6. Admonitio-
 nes autem siue interiores Dei, siue ho-
 minum exteriores parum est ei exaudi-
 re, qui obedire derectat. 7. Porro
 prioris vitæ delicta sic detestanda sunt,
 ne novis identidem cumulentur. 8. Ne-
 que ullus placere se putet Deo, qui sibi
 nondum displicet. 9. Nec Christum à
 se amari credat, qui in se Christi præsen-
 tiam non amat. 10. Affectibus vitio-
 sis, principio præsertim, fortiter obfi-
 stendum, nam hîc esse potest, quisquis
 volet, Imperator. 11. Sic denique vo-
 luntas in bono firmabitur, alioqui sem-
 per vacillatura. 12. Sic & mors eo mi-
 nus erit formidini, quo sæpius fuerit
 objecta

objecta meditationi: non invitus morietur, qui se moriturum quotidie & serio cogitaverit. Et hæc via est ad illam fine morte vitam. Suam nunc quisque conscientiam interroget, num hæc prædestinationis signa in se observarit, unde sperare possit, se via proborum quæ ad cælum ducit, non errare. Via peccantium complanata lapidibus, & in fine illorum inferi & tenebræ. Et tamen hac sub initium facili, plana & amœna via, densissimum agmen ita confertim ruit ad interitum, ut vel oculi testari cupiant, verissime à Christo dictum esse: *Lata porta & spaciola via est, quæ ducit ad perditionem, & multi sunt qui intrant per eam. Multi, multi.* Complurium scriptis narratur, anachoretæ per extasin visas animas, densæ nivis instar aut pluvie ad inferos delabi: adeo ut damnati manes (narrat id Lusitanus orator) non immerito quærere possint: nunquid mundus ut antea perseverat? tot enim animæ in hunc locum tormentorum veniunt, ut vix credibile, tot homines in mundo esse posse.

Sanctus Vincentius Ferrarius Valentinus, è Sancti Dominici familia religiosissimus, & vere igneus ecclesiastes de paucitate prædestinatorum publice pro suggestu disseruit, dictaque confirmavit celebri exemplo. Tanti auctoris verba mutare religioni duximus; ea fideliter adnumerata, hæc sunt: Ante-

Eccles.
6. 21.Philip.
Diez
tom. 5.
con. 2.
die B.Virg.
ad Ni.
S. Ant.
3. par.
hist. tit.
24. c.9. §. 2.
Hier.Plat.
l. 1. de
bono
stat.
rel.
c. 15.

S. Vincent. quam Christus veniret in hunc mundum
Dominica in humana carne, trāsierunt ultra quin-
Sept. serm. 6. que millia annorum , & totus mundus
post in-itiū. damnabatur , exceptis paucis de popu-
Sed lo Israēl , qui ibant ad limbum sancto-
plures rum patrum. Item, tempore legis Mosi,
hoc idē cogitate quot infantes mortui sunt abs-
narrāt. que circumcissione. Sic modo tempo-
Quid re legis Christi, quot moriuntur absque
hac in baptismo, & de his nullus salvatur. Itē,
resen- quot Iudæi, quot Agareni, quot pagani
tiendū, & infideles. Item, quot mali Christia-
vide ni, quia fides & baptismus cum bona
Iacobū vita salvat hominem, alias non. Quot
Gra- Christiani sunt, qui licet habeant fidem,
nadium tamen sunt superbi, avari, luxuriosi, &
theol. in sic de aliis peccatis , &c. Nota hīc de
1. par- Archidiacono Lugdunensi, qui per qua-
tem D. draginta annos fuit in eremo magna
Thoma pœnitentia , postquam resignavit sua
tom. 2. beneficia, qui post mortem apparuit E-
tract. piscopo Lugdunensi, qui quæsit ab eo
12. ut diceret sibi aliquid de alio mundo,
disp. 4. qui respondit , quod in die qua ipse o-
mihi biit, mortui fuerunt in mundo trigin-
pag. ta millia, de quibus solum quinque fue-
719. runt salvati, scilicet ipse, & beatus Ber-
Putat nardus, qui etiam illa die obierat , qui
hic au- statim sine purgatorio ascenderat ad
ctor ē paradisum, & tres descenderant ad pur-
Chri- gatorium; alii quidem descenderunt ad
stianis infernum. Propterea dicit Christus :
plures Intrate per angustam portam. Angusta
salvā- porta
dos: à quo non dissentimus. De quinque
millibus annorum alii aliter sentiunt.

porta paradisi, Voluntas Dei est. Ad istam oportet se restringere, qui paradysum vult intrare. Lata porta est, Voluntas propria. Via spatiosa inferni, conversatio mundanalis, bene comedere, bene bibere, luxuriari, delectari, vindicare se de injuriis &c. Pauci sunt electi: Hæc cohortatio beati Vincentii, cui alium addimus Euangelicum oratorem.

Bertoldum memorant è D. Francisci familia, disertum ævo suo per Germaniam concionatorem, cum pro suggestu certum quoddam vitium gravissimis verbis infectaretur, feminam ejus sibi consciam, tantis animi doloribus haustam, ut in media circumstantis populi corona, velut exanimis repente corruerit, mox tamen ad populi preces redierit ad se, recensueritque quæ ad Dei tribunal vidisset, illud cumprimis: Adducta illuc sexaginta millia, vario mortis genere defunctorum, ex omni gente, Christianis Barbarisque, ac tres duntaxat animas ex ingenti hoc numero ad brevius supplicium relegatas, ceteras ignibus addictas æternis. O vere **MULTI** qui intrant per eam, per latam & spatiosam viam perditionis! Hoc sensu Christi, Ioannes Chrysostomus ausus est scribere & dicere: Multo sunt plures gehennam ingredienti, sed majus est Dei regnum, licet habeat paucos. Et: *Quot* 24. &
tom. 5. pag. 248. hom. 40. in Act. Apost. tit. de pan.

Quot esse putatis in civitate nostra qui salvi fiant? infestum quidem est quod dicturus sum, dicam tamen: Non possunt in tot millibus centum inveniri qui salventur: quin & de his dubito. Quanta enim in juvenibus quæso malitia? quantus in senibus torpor? &c. Hæc Chrysostomus, vir prudentissimus & sanctissimus, Ecclesiæ doctor, lumen orbis; idque dixit de Antiochia urbe longe populosissima, idque eo tempore quo primævæ Ecclesiæ spiritus nondum intepuerat. Quis jam miretur, Paulum

Ad Phil. 2. adeo sollicitum monere: *Cum metu & tremore vestram salutem operamini*; quando Christus ipse tam aperte præmonuit:

Luc. c. 13. *Contendite intrare per angustam portam.*

Contendite, clamat Veritas, contendite, enitimini, adlaborate, conamini omnibus viribus, ut hanc portam dignis pœnitentiæ fructibus penetretis. Vacillantibus & ludibundis passibus huc

Cor. 9. non venit: vigilantissimo conatu opus est, & qui velit difficultates quas-

Gal. 5. cumque perfringere. Nisi enim mentis intentio ferveat, ait ex Gregorio Beda,

Col. 3. & vim sibi insigniter homo faciat, facile gradum revocat, haud valens portæ

Mat. 3. angustias pertransire, præ ea quam patitur effrænum carnis concupiscentiarum effusione: ut præteream tentationes persecutionesque, quos dæmon &

Lib. 11. mundus iis movent, qui portam hanc

mor. c. 26. trajicere conantur. Et uti remiges ad-

in nov. exemp. versus

versus flumen scapham impellentes,
 omni quo possunt conatu remis incum-
 bunt : sic qui contra tot hostium insul-
 tus animam ad cœlum impellunt , toto
 pectoris annisu virtuti incumbere , im-
 petumque impetu majori vincere ne-
 cesse est ; si nolint , anima perinde ut
 scapha , vi fluminis in errorem irrepara-
 bilem abripietur. *Evigilate itaque justi,* I. Cor.
& nolite peccare. Is autem vigilare cen- 15.
 sendus est , qui sic semper & ubique vi-
 vit , ut unamquamque lucem tanquam
 ultimam & non redituram consumat :
 qui in omni cogitatu & facto sic suam
 observat conscientiam , quasi hodie
 moriturus. Faciamus ergo dum possu-
 mus , quod fecisse vellemus , cum non
 amplius poterimus. *Quæ seminaverit* Gal. 6.
homo , hæc & metet : quoniam qui seminat
in carne sua , de carne & metet corruptio-
nem : qui autem seminat in spiritu , de spi-
ritu metet vitam æternam.

F I N I S.

Approbatio
R. P. Provincialis.

ZOdiacum Christianum locupletatum, quem P. Hieremias Drexelius, Societatis nostræ presbyter, de duodecim Prædestinationis signis conscripsit, aliquot ejusdem Societatis Theologis censum probatumque; Ego Christophorus Grenzing, Societatis Iesu per superiorem Germaniam Præpositus Provincialis, facta mihi potestate, ab admodum R. P. N. Generali, Mutio Vitellesco, in lucem dari permitto: fidemque mea manu facio, & more Societatis consigno. Monachii I I I. Idus Septembres. Anno M. D C. X X I.


Christophorus Grenzing.















2686-563



